



Novema 2021

TOMANATUGA FA'ALEAGAGA NOVEMA 2021

“OLE MAVAEGA NAI LE APITĀ O GALU.” (GALUEGA 20:36)

“ Ua sili lava lo latou tigā i lea upu ua ia fai atu, latou te lē toe iloa ona mata, ona momoli lea e i latou ia te ia ile va'a.”

O le a ta'alolo pea ia Paia ma mamalu maualuluga, Paia ole talalelei aua le afio ole tamā katinale, afifio le ituaiga-sā ma le aufaigaluega tainane lo tatou Tina malōlō manumalo. Afifio o tamali'i, le alalata'i o falepolu, faletua ma tausi, tainane le matalasiasi ole tatou Kapelenisia Samoa i Ueligitone nei e afua mai ona mauga maualuluga seia pa'ia lava le tinifu. Ae avea ia le auauna fa'atauva'a e fai ma leo ole Afioga ia Salā, tainane le afioga ile ta'ita'ifono ma le ofisa, ma le komiti fa'afoe ole tatou Galuega nei, e matou te toe ofo alofa ma toe fa'atalofa atu ai fo'i ile tatou Kapelenisia aemaise le au faitau ole tatou TAULOGOLOGO i so'o se tafa ole atunu'u nei, ma atunu'u mamao o lo'o ua maua o lo'o mafai ona o'o atu i ai lenei auaunaga. Talofa! Talofa! Talofa lava.

Fa'afetai ile alofa tausi va'atele ole Atua i lo outou soifua ae fa'apea fo'i lo matou nei ola, o lea fo'i ua tauta'i a'e i fanua le faiva o gogosina sa tofuina aau mamao ma taisou. E ui lava 'ina feagai lo tatou Atunu'u ma le lalolagi ma tulaga faigatā ona o lenei fa'ama'i oti, ua matua'i tofotofoina ai lo tatou fa'atuatua. Peita'i, ua finagalo malie lava o ia, e momoli saogalemuina mai lo outou soifua ma i tatou uma i lenei foi masina fou o Novema. Ua tapenaina lava e le Atua laolao ma laofie e feiloa'i ma mafuta ai lana fanau, i luga o lenei fo'i auaunaga ma lenei tautua.

E ui lava fo'i ina ua le utuvā ma lē 'alofia le moemoenoa ma le lau-fa le ainā, ae fa'afetai tele le Paia ile Ituaiga-sā ma le aufaigaluega mo la outou fa'anōnōga-manū. la saga viia ina pe'a le suafa mamalu o le Atua.

“ OLE MAVAEGA ILE APITĀ O GALU.” O ni lagona fatufatu e tau fa'amatalaina ai upu taumavae a le Afioga ile Osi-taulaga Patele Tuli Leota Paulo, i lana lauga fa'amavae ma lana toe Misasa fa'ai'u, na ia fa'amavae atu ai ma le Aulotu Katoliko Samoa i Naenae. “ O la'u Misasa mulimuli fa'amavae lenei ma outou. Atonu tatou te lē toe feilo'ai, pe tatou te toe feilo'ai fo'i. Tautuanā ma outou le Aulotu, le autalavou, le aufaipese. Ua ou iloaina lo outou alolofa ile Fesoasoani ma lona faletua. Fa'afetai lo outou agalelei ma le alolofa ia te a'u e ala i mea uma. Upu o MAVAEGA.

E i ai le mau, afai e foufou lātōiletai le fa'amoemoe, ona mo'omo'o lea o manatu, e le gata ina ia saomāuli le folaua, ae ia tā'oto fo'i ā peauto'a le fa'amuli. A laga'i le vaogagana o mavaega, ona fa'atau lea o lagona, e fetu'una'i fo'i le loto ma le mauli, ae nofo sauni lauifi inā tutulu. Aemaise mea nei o mafutaga ua mamae, ae a o'o 'ina uluulu, ole upu moni e le faigofie ona talalua.

O `ataata ia ole tala o lo'o tau fa'amatalatala mai e le ali'i foma'i o Luka, ile (Galuega 20) o lo'o i ai le matua e pei ona fa'amamafaina i le tatou tomanatuga fa'aleagaga. “ Ua sili lava lo latou tigā i lea upu ua ia fai atu ai, latou te lē toe iloa ona mata, ona momoli lea e i latou ia te ia ile va'a.”

O itugalua o lo'o fa'amatala e Luka, sa taufai lofia ile atumatagi, auā a talalua le fa'atasiga, ona to lea i moana o fa'amoemoega. A'o taugā mafanafana fo'i ole mafutaga, o lea ua fa'alavefau ai mea nei o mavaega.

“O le mavaega ile apitā o galu”, o se vaega taua lea ole Tala o le tala'iga. Auā o lo'o atagia mai ai itu taua nei.

AFOGA KATINALE JOHN DEW

Kia tau te rangimārie ki a koutou

Ua o'o mai le taimi, talu mai tausaga e 57 ua tatau ona tatou va'ava'a'i i le fa'aupuga "O Tagata O Le Atua"

O le taimi fo'i ua tatau ai ona tatou maitauina o le fa'aupuga "o Tagata o le Atua" ua fa'asino lea i tagata uma, latou uma ua papatisoina. Ua silafia e Pope Faranisisi lenei. O Pope Faranisisi i se gaioga loto toa tele ua talosagaina ai Epikopo uma i le lalolagi ina ia mautinoa e fa'atalanoa tagata mo le tapenaina ma le sauniunga mo le Sinoti i Roma ile tausaga 2023. O se Sinoti e fa'amoe-moeina e mafai e tagata uma lava ona iloaina ma lagonaina o lo'o tataou feso'otai pea ma isi tagata ua papati-soina ma ia fesoasoani ia i tatou e auai atoatoa i le ola o le Ekalesia ma auai i le "misiona."

O le fa'aupuga O Tagata o le Atua o lo'o va'aia i le Mataupu Silisili o le Fa'avae i le Ekalesia (Lumen Gentium) a le Fono Lona Lua a le Vatikano. O lenei tusitusiga ua tatala ai le avanoa mo se malamalama'aga fou ma le va'aiga fa'atelosia i le talisapaia o le ā le Ekalesia, ma o ai ona suli.

A o sauniuni lenei tusitusiga i le amataga i le 1960 na amata i se tomanatunatu i le Misitelia o le Ekalesia ona aga'i sa'o lea i le tala e uiga i le Pope ma Epikopo, le au osi-taulaga ona soso'o ai lea ma tagatā lotu. I le mae'a ai o le tele o tomanatunatuga ma fa'atalanoaga o latou sa potpo-to na tu'uina sa'o lava le mataupu O Tagata o le Atua i le mae'a ole fa'atalanoaga i le Misitelia o le Ekalesia, ina ia fa'amuamua mai Tagata o le Atua, ona soso'o mai ai lea ma le Pope, epikopo, ositaulaga ma fa'apea ai lava...

O Tagata o le Atua o se folafolaga mo le ō tutusa atoatoa ma le a'afia atoatoa o ali'i ma tama'ita'i, tagatā lotu ma le 'au fa'au'u, mau'oa ma le au matitiva, tagata pa'ia ma le au agasala. O le Ekalesia o tatou. Ua vala'auina i tatou uma ina ia avea ma vaega o le sinoti o le a aga'i atu i le Fa'apotopotoga Sinoti i le 2023. I se taimi i luma o le a tou va'ai ai i ni fa'amatalaga po'o fa'apefea i lenei fa'atalanoaga ona fa'ataunu'uina i la tatou pule'aga.

Ou te mana'o ina ia faitau selau tagata e a'afia ai. O la tatou faigamalaga fai fa'atasi e va'ai lelei ai po'o le a tonu le Ekalesia, tagata faimalaga fa'atasi, o tagata faimalaga ma le fa'amisionare a le Atua. Fa'amolemole fa'alogo logo ma va'ava'ai ina ia maua e tagata uma le avanoa e tali ai i lenei fa'atalanoaga na sau mai ia Pope Faranisisi.

30 Setema 2021

Iā Tesema ole tausaga talu ai na lomia ai e Pope Faranisisi se tusi ua ta'ua "Tatou faia se Miti – O le Ala i se Lumana'i Sili". Na tusia fa'atasi lenei tusi ma le ali'i tusi tala o Aus-



ten Ivereigh. O se tusi matagofie ma e aogā i le faitau. O lea ua fa'aosofiaina e Faranisisi i tatou i se isi auala e mafaufau ai i le uiga - "O le Ala i se Lumana'i Sili."

Ou te talitonu ua vala'auina i tatou uma e Pope Faranisisi ina ia 'au ai i le tapenaga mo le isi Sinoti i Roma o se fasitepu i se lumana'i ua sili atu. Ua vala'auina uma i tatou ina ia faia so tatou sao i le mafaufauina o le Ekalesia ua tatou manana'o iai i le lumana'i, ma aua ne'i misia lenei avanoa. O nisi o tagata ua fa'alemanino e uiga i

Sinoti ma ua manatu e uiga i ni suiga i mea ua tatou talitonu ai o ni Katoliko. A faia ni Sinoti, pe o ni Sinoti a Atunu'u 'ese'ese a le lalolagi i Roma, e pei o tatou lava Pule'aga Fa'aakiepikopo i tausaga ua tuana'i (e fa le aofa'i), o le moni i agafanua o le Fa'akerisiano e le fa'atalanoaina. O Sinoti e uiga pe fa'apefea iā tatou a'oa'oga ona ola ai ma fa'aogā i suiga o nei taimi. O lo'o manino lelei mai lenā mo tatou. Pe fa'apefea ona tatou ola ai le Evagelia i aso ta'itasi o le vaitau o le tele o lu'itai ma suiga o le lalolagi ua tatou ola ai e mana'omia ona mafaufau tele i ai.

O le aso To'ona'i 25 Setema na fa'atino ai le la'asaga muamua o le a'afiaga i lenei faigamalaga o le avea ma Ekalesia Fa'asinoti. Ona o le KOVITI Lapata'iga Tulaga 2, o le Fono masani Aoao Fa'alafulemū (APC) na pu'upu'u lava ma sa faia i luga o vaega Fa'atafa'ilagi. O masina ua mavae atu sa ou a'afia ai i ni fonotaga fa'apenei ma o nisi ua maua ai i le lēlavā, ae o le fonotaga lea a le tatou komiti sa matuā matagofie tele. Matagofie ona sa matou faia ai se tasi o tomanatuga/fa'alogo logo a le Sinoti. Sa matou vae-vaeina i ni kulupu se lua, ma o latou uma sa 'au ai na faia ni manatu ma na fa'alogo logo uma ma le fa'aaloalo. Ou te iloaina e mafai ona fa'ateleina lenei faiga i le tatou Pule'aga i vaiaso o i luma. O le vala'aulia o lo'o i ai e 'auai, ma faia sou sao. O lona uiga o le fa'alogo logo i isi ma le fa'aaloalo, ma sauniuni e fa'alogologo, ae le faia o a tatou lava tali ua uma ona sauniuni, ae ia tatala atu lou tagata e fa'alogologo ai i le isi tagata o lo'o tufa mai ma fa'alogologo i le Agaga Pa'ia.

I lana tusi na tusia ai e Faranisisi "O le fa'ailogologo o le ala Fa'asinoti o le matafaioi lea a le Agaga Pa'ia. Tatou te fa'alogologo i fa'atalanoaga i kulupu, ae o le fa'atutumumuga lava tatou te fa'alogologo po'o le ā le mea o lo'o fai mai ai le Agaga Pa'ia iā i tatou. O le mafua'aga lea ua ou talosaga atu ai iā outou uma e talanoa sa'o ma le manino ma le fa'aaloalo ma fa'alogologo lelei i isi ona o i'inā fo'i o lo'o talanoa mai ai le Agaga Pa'ia.

Nāku noa. Nā
+ Ioane

TOMANATUGA FA'ALEAGAGA NOVEMA 2021

E TULA'I MAI LE ALOFA, ILE ITUASO OLE MATUITUI

A feuluulua'i le alofa ma le agalelei i itūgalua, ona fa'atupu malosi lea o mea nei o mavaega. E fa'i o ia a alu, a'o lē fo'i a nofo. A lototele a alu, e mafanafana fo'i le uō a nofo. Tainane pe la te taufai tutulu, a'o la loimata e fai lea ma vaimalū ile lafufuā ole taumavaega. Auā a o'o ina pa'ulia le vaogagana, ona fa'amata mai la lea e o la loimata o lagona ole loto.

E UI INA MATAUTUIA MAVAEWA, A'O TAEAO FO'I LE ISI ASO.

Na tu'umuli le Aposetolo ma lona mautinoa, ua muta la latou mafutaga ma le au uso. A'o totonu o lona loto, na na iloaina lelei lava, o se mea i luga, po'o se mea i lalo nei, o se mea o a taeao po'o se mea o atalī, e leai lava se tasi mea na te fa'atete'a i latou ma ia keriso. I le tainane ina fitā le ituaso ole faoafolau, peita'i e pei lava ole upu

e fai ile tai masa, e i'u lava ina toe fana'e.

Lau afioga Patele Tuli, o lenei ole a tatala le filiali'i, ma tu'uama le fua, ae toe seu i fanua lau fa'atamasoali'iga, e pei ona liuliu le Tofā a le Afioga ile Tama Pule aemaise le moe na tofāmamao i ai le Ituaiga Ole Misionare ole Fa'atuatua.

O le upu moni, ua malie loto, ua malie le agaga, ua malie mata i vaai, ma ua logoitino matagi na tutupu i liu. O lau fa'alelegafulu fa'aleagaga, ua osaosa ai a matou ola, ma taumasuasua ai a matou ipu. O upu ile Olomu ma Lefaoceu, se ua setogi lau seu na lagatila ua fa'apulou le tuālima. Patele ua fa'amalo fai ole faiva. Fa'afetai mo au galuega fa'asakalameta e ala ile fafagaina o matou agaga e le gata ile UPU a'o le talisuaga ile TINO ma le TOTO o lesu Keriso. Mai le Ituaiga Sa ma le Aufaigaluega, le Afioga ia Salā ole Ta'ita'i ole tatou Kapelenisia, Afioga

ile Ta'ita'ifono ma le Ofisa Tutotonu, le komiti fa'afoe, le nofo a nofoa ma ofisa o Eklesia uma aemaise le tatou Kapelenisia i ona falesa e fia, matou te fa'apea atu ai. FA'AFETAI! FA'AFETAI! FA'AFETAI TELE LAVA. Manuia tele lou valaaui na mo tofiga fou. Seia tatou toe feiloa'i.

“ Ua sili lava lo latou tīgā i lea upu ua ia fai atu ai, latou te lē toe vaaia ona mata, ona momoli lea e i latou ia te ia ile va'a.”

MANUIA TELE LE ALOFAIVA OLE TATOU KAPELENISIA I TIUTE MA FAIVA O LENEI FO'I MASINA FOU

Tatou tatalo: Maria Paia e le Tina ole Atua. Talosia i matou o e sulufa'i atu ia te oe.

Ia manuia ona o Keriso

Vueli & Veronika Tuitolova'a (FK)

O ALA O TATALO TATALOINA O SALĀMO

O Salāmo o le aoina o solo pa'ia sa fa'aogāina e Israelu i ana tatalo laua'itele ma tapua'iga ta'ito'atasi. Ua a'afia ai le 150-o solo tatalo ua tu'u fa'atasia i se tusi e tasi ua ta'ua o le Tusi o Salāmo. O le tele e masalomia sa fuafuaina e peseina pe fa'aalu fa'atasi ma se musika. O le tele o Salāmo ua tumu i le fiafia ma le viv'i i le agalelei o le Atua; o isi ua tumu i le fa'anoanoa ma auēga po'o le agaga o le Salāmo. O lo'o i ai le tele o vaega 'ese'ese i Salāmo, ae ua tu'u fa'atasia i le tulaga o nei solo o tatalo, upu ua tuputupu a'e i le loto o lē ua fa'atuatua. I le Tusi Pa'ia e pei ona i ai, ua fa'aleo mai e le Atua ana upu i le tagata. I Salāmo, o le isi faiga: o Salāmo ua fa'aleo atu ai le tali a le tagata i le Atua. O le peseina o le Salāmo o se tali fa'atalitali i le talosaga a le Aposetolo, "Le Ali'i e, ia e a'oa'o mai iā te i matou i le tatalo."

O lenei tali ua atagia mai ai le Tusi Pa'ia lava ia. E pei ona maua i le Tusi Pa'ia tusi o talafa'asolopito, ua fa'apea fo'i o Salāmo o tala fa'asolopito.. Ioe o Salāmo o ni Tusi Pa'ia i ni tusi laiti.

O le fa'amatalaga atoatoa ma le pito sili le tāua i Kerisiano o le vaega fa'apitoa i Faisalamo ua le masalomia o Sagato Athanasius i lana tusi mai le seneturi e fa ia Maselino. Mo Anthanasius o Salāmo ua fa'amaopo maia le olaga atoa o le tagata, o gaioiga uma o le loto o le tagata. O Salāmo ua aumaia iā i tatou auala e fa'ailoa atu ai le Atua i so'o se tulaga ma taimi uma.

Pe ua i ai se alagatatau o Salāmo po'o kofesio, po'o puapuagā ma fa'amasinoga ua alofagia ai i tatou, po'o se tasi ua fa'asalaina, po'o ua taupulepule i se isi, sa puipuia o ia....po'o ua mana'o e pese vi'iga ma avatu le

O ALA O TATALO

TATALOINA O SALĀMO

fa'afetai i le Ali'i – mo so'o se fa'ataunu'uga ua ia fa'atonauna i Salāmo mamana.

A o tatou laulaufina Salāmo ua fa'asolosolo ona avea ma a tatou tatalo fa'apitoa. Ona o le Faisalāmo ua pei o se "fa'a'ata" po'o se "āta" i lē ua peseina, fai mai ai Athanasius, "ona e ala i Salāmo ua ia tomanatu ai o ia lava ma fa'alogoa'aga i lona agaga." I le avea o se fa'āta, o Salāmo ua le gata ua ta'ita'ia i tatou i se malamalamā'aga loloto iā i tatou lava, ae suia ai i tatou, ua gaioi e pei o se fa'amalologa: ua toe fuafuaina ai o tatou olaga i totolu ina ia talafeagai ma upu a le Atua.

O le va'aiga a Athanasius i Salāmo e fa'apitoa lava i o latou a'afiaga o tagata ta'ito'atasi; ae o tusitusiga a Sagato Aukusitino ua tatou maua i ai se fa'aogaina o Salāmo i o latou tulaga fa'alelotu. Ona o ia o se epikopo, sa fa'aautū e Aukusitino le ua'i i le malamlama'aga o lē o lo'o laulaufina le Salāmo e pei o Keriso, ma ona o se Ekalesia e le gata o lo'o ia tatalo ai ae o lo'o tatalo ai mo le Ekelsia. I se tasi o ana lauga i Salāmo, sa tusia e fa'apea: la tatou maitauina ona o tatou leo iā ia ma lona leo i totolu o tatou."

O lo tatou Ali'i i nisi o taimi e tautala i lona lava peresona, o lo tatou Fa'auluuluga, ma i nisi o taimi i le

tagata o lona Tino misitelio ua faia ai i tatou. Afai ua tatou lagonaina le fiafia, o se Salāmo fa'anoanoa ua foliga e lē talafeagai, ae a mafai ona tatou tatalo e pei o suli o le Tino o Keriso, iloina o lo'o i ai se isi i le Ekalesia o lo'o lagonaina fa'apea. "O ai lava e lauina le Salāmo i le igoa o le Ekalesia e mafai lava ona mauaina se mafua'aga mo le fiafia po'o le fa'anoanoa." Na tusia e Aukusitino e fa'apea, "o le fa'aogaina iā ia lava o upu a le au aposetolo: la outou olioli fa'atasi ma ē ua olioli, ia outou tagi fo'i fa'atasi ma ē ua fētāgisi" (Roma 12: 15); o le vaivaiga fa'aletagata ma lona fa'apito ua fa'aleleia lea e le alofa."

O pese o Salāmo o se a'oa'oga lelei tele mo tatalo, a'oa'ole uiga o tatalo. Muamua, o lona uiga o le tatalo e pei o le Upu a le Atua. O tatalo Kerisiano ua mapuna mai le upu fa'aalia a le Atua. Lona lua, ua tatou a'oa'oina mai Salāmo pe fa'apefea ona tatalo i so'o se tulaga lava. Tolu, o Salāmo ua a'oa'oina i tatou e tatalo o se fa'apotopotoga – pe fa'apefea ona si'i atu i luga atu o tatou popolega fa'aletagata, ia tatalo ma le leai o se manatu fa'apito, va'aia o tatou tatalo ua na o se fasi vaega o le tatalo atoa a le Ekalesia.

4

FUAFUAGA A POPE FARANISI SI E TOE FAFAGU I LUGA MATAUPU FA'ASINOTI

O le isi fonotaga sa fuafuaina mo epikopo i Roma ua toe tolopōina nei i le 2023 se'i mae'a ona faia se fa'atalanoaga a Katoliko e le'i faia muamua.

Na mua'i fuafuaina e Pope Faranisi se sinoti ma o lona sini 'autū o se fa'atalanoaga mo Oketopa i le 2022, ae i se toe fuafuaina fou, ua talosaga Roma i pule'aga uma ta'itasi a le lalolagi atoa e amata le vaega muamua o le fa'agasologa i le aso 17 Oketopa o lenei tausaga.

O falefa ta'itasi o le a tu'uina atu i ai o fa'amatalaga mo le fa'ata-

lanoaina ma le fetufā'iga e tatau ona fa'aauau se'i o'o atu ia Aperila 2022 pe a taunu'u atu i le taimi e tatau ai i pule'aga fa'aepikopo ona tu'uina atu a latou fa'atufugaga i fonotaga a latou epikopo. E le'i manino lelei mai po'o le ā tonu le mataupu e fa'aautū i ai le fa'atalanoaga ae o sini o le sinoti: Mo Ekalesia fa'asinoti: "fetufā'iga, 'au ai fa'atasi ma le misiona."

Ona fono ai lea o Epikopo e "fa'alogoologo i fa'aosofiaga a le Agaga i ekalesia ua tu'uina atu mo lo latou tausiga" ma na mulimuli

mai ai lea o le "vaega fa'aatunu'u" o le su'esu'eina ma le iloatino.

Amata mai ia Setema 2022 se'iā taunu'u atu ia Mati 2023 o epikopo mai vaega 'ese'ese o le a fono ma tusia se fa'amatalaga e ave i le ofisa o sinoti i Roma. O le vaega mulimuli o le sinoti o le a fa'ataunu'uina lea i le Vatikano ia Oketopa o lenā lava tausaga.

I lana nofoa'iga atoa lava, sa vala'au pea Pope Faranisi mo se ekalesia fa'asinoti, se faiga e mafai ai e epikopo, ositaulaga ma tagatā lotu ona "savavali fa'atasi" i se misiona

e tasi. I sana lauga ta'uta'ua i le 2015, na fa'amamafa mai ai e Pope Faranisi o le fonotaga fa'ae kalesia "o se fa'amoemoega lea a le Atua mo le Eklesia i le mileniuma lona tolu" ma ua vala'auina mo le a'afaga ma le 'au ai atoa o tagatā lotu i le faiga o fuafuaga ma fa'ai'uga.

I se fa'atalanoaga ma le Fai Tala Fou a le Vatikano, o Katinale Mario Grech, o ia na ta'ita'ia le sinoti fa'afailautusi i Roma, fai mai o le fa'ai'uga e tolopō le fa'apotopotoga i Roma ona "o le taimi ua talafeagai mo le 'au ai o Tagata o le Atua i le fuafuaga ma faiga o fa'ai'uga i mataupu fai a le Eklesia atoa ma tagata uma ole Eklesia."

Na fa'amanatu mai o le Fonotaga o le Vatikano Lua na a'oa'oina o "Tagata o le Atua e 'au ai fa'atasi i le ofisa fa'aperofeta a Keriso." E tatau la ona fa'alogi i Tagata o le Atua, ma o lona uiga o le alu atu i falesa ta'itasi.

O le fa'atinoga o mataupu i faiga fa'asinoti ua mau'a i Kerisiano ana-mua ma le vaega o le 1,000 tausaga muamua o le Eklesia Katoliko, ua fai mai Katinale Grech ua fa'aso-

losolo ona moumou malie atu i le vaitau o le meleniuma lona lua. O le fa'atulagaina o sinoti a epikopo na fa'avaeina e Pope Paulo VI i le 1965, i le fa'ai'uga o le Vatikano II, o se auala a fesoasoani ai i le Pope ma lana ta'ita'iina o le Eklesia.

Ae mo le taimi nei, o eklesia uma i le lalolagi ua fa'ailoa mai po'o ua amata a latou faiga fa'asinoti e a'afia ai Ausetalia, Siamani, Italia ma Iolani ae o epikopo i Amerika Latina o lo'o faia se fa'agasologa laua'itele fa'akotineti – atoa.

O Katinale Grech ma Tulafono fou mo le sinoti o lo'o ta'ua a'oa'oga a le eklesia e uiga i le sensus fidei, "le manatu i le fa'atuatua" a le au fa'atuatua, ma le manatu "o le Eklesia atoa e lē sesē i ana talitonuga".

Fai mai le katinale o le maopopoga i le Eklesia e le na o se ausia i le "fa'amalosia o le pule a faife'au" ae mana'omia le amana'ia, fa'aso, faimalaga fa'atasi ma le fa'aaloalo i matafai o 'ese'ese a tagata o le Atua."

Sa ia fa'apea mai: E tusa ai ma le finagalo o le Atua, se tasi o fua o le

Sinoti ia tatou malamlama uma o le fa'agasologa o fuafuaga ma fa'ai'uga e taunu'u i ai le Eklesia e masani ona amata i le fa'alogi, ona o le auala lenei e mafai ai ona tatou malamalama pe fa'apefea ma o fea e mana'o le Agaga e aga'i i ai le Eklesia.

O le Fa'asinoti e amata i le fa'alogi i tagata uma o le Atua. O se Eklesia e a'oa'o e tatau ona avea muamua ma Eklesia e fa'alogi. Fa'atalanoa suli uma o le Eklesia e tāua ona, e pei ona fa'amanatu mai e le Fonotaga Lona Lua a le Vatikano, o le au fa'atuatua atoa ua fa'apa'iaina e le Agaga Pa'ia...

O le mea e fa'atinoa le auala fa'asinoti o le matafai o le Agaga Pa'ia. Tatou te fa'alogi, tatou te fa'atalanoa o ni kulupu, ae o le fa'asilisili lava ia tatou mata'itū lelei po'o le a le mea o lo'o fai mai ai le Agaga iā i tatou. O le mafua'aga lenā ua ou talosaga atu ai i tagata uma lava e tautala sa'o ma fa'alogi lelei i isi ona o i'ina fo'i, o lo'o tautala ai le Agaga. Ia tatala atu i ni suiga fou, o le Sinoti mo tagata uma lava o se masani o le fa'aliliuga.

O PEROFETAGA MATAGOFIE MAI LE TUSI PA'IA UA FA'ATAUNU'UINA

(fa'aauau mai lomiga talu ai)

O le ta'ua o "puipui vae lua e lē punitia ai faitoto'a" ua fa'aali mai ai pe na fa'apefea ona tatalaina e le Atua le ala mo vaegā'au a Kuresa e osofaia ai le 'a'ai. O le 'a'ai o Papelonia sa foliga mai e lē mafai ona ulufia e nisi ona o pa tetele ma le malolosi ma le puipua sa faigatā ona sao atu ai nisi. Ma sa lava ma anoanoa'i mea'ai sa teuina pe tusa ma le luasefulu tausaga le umi e fa'aoga ai – o le mafua'aga lea na amusia ai e le au Papelonia Kuresa ma lana vaega'au ina ua taunu'u le osofa'iga. O le vaitafe o le Eufarate e tafe atu i le ogatotonu o Papelonia ma e tafe atu i lalo o se pa u'amea tele i ona

pa puipui. Na fa'aoga e Kuresa se atamai mao'a'e e sua ai le mea e aga'i i ai le tafe o lenei vaega; na 'eliina ni alavai e sui ai le auala e tafe i ai le vai.

E sili atu ma le selau tausaga i luma atu o lona fanau mai, na valo'ia e le Tusi Pa'ia o lona lava igoa o Kuresa le ta'uta'ua o le a osofa'ia le 'olo tele i Papelonia. Sa tusia fo'i e se tusi tala fa'asolopito mai Eleni o Herodotus lenei mea na tupu. O Kuresa ma nisi o ana vaega'au sa fa'aititia le loloto o le vai na mafai ai ona ui atu ai o fitafita a Peresia, sa fa'atalitali Papelonia mo lenei

O PEROFETAGA MATAGOFIE MAI LE TUSI PA'IA UA FA'ATAUNU'UINA

fa'amoemoe, na ui atu i le vai ua gata i tuli vae lona loloto ma aga'i atu i le taulaga..O le 'au Papelonia latou ia ona o le telē o le taulaga o autafa o le 'a'ai na pu'eina e aunoa ma le iloaina e tagata sa nonofo i le ogatotonu o le taulaga; sa i ai se fa'afiafiaga sa faia i lea taimi ma sa fa'aauau lava ona sisiva ma fa'afiafia i latou lava se'ia taunu'u atu le tala i se auala faigatā. O le tala lenā o le ulua'i osofa'iga ma le pue'ina muamua o Papelonia.

Ae o se mea maoa'e tele o le tusi tala fa'asolopito o Herodotus na fa'amaonia, e pei o isi, o le perofetaga a le Tusi Pa'ia na fa'ataunu'uina lelei lava. O le perofeta o Tanielu sa i ai i le taulaga o Papelonia i le afiafi na pu'eina ai e le vaega'au a Kuresa o Peresia Papelonia. Ma na ala mai i lenei perofeta, na fa'ailoa atu e le Atua i le Tupu o Peresara le mea ole a tupu iā te ia ma lona malō. O le tala ta'uta'ua lenā o tusitusiga a le Atua i pa puipui. Sa tapena le Tupu o Belshazzar mo faigā 'ai, se fiafia tele, mo le afe o aigā tupu. Sa inu uaina mai ni ipu 'auro mai le Malumalu i Ierusalem. "O lea lava itulā na o'o mai ai tamatama'i lima o le tagata, ma ua tusi i le panisina o le pā puipui ua feagai ma le tu'ugālamepa i le maota ole tupu; ua iloa fo'i e le tupu o le lima ua tusi. Ona liua lea o fofoga o le tupu, ua atuatuvalo o ia i lona mānatunatu, ua tatalaina so'otaga o lona pāpātua, o ona tulivae fo'i ua fa'afeto'ai le tasi i le tasi" (Tanielu 5: 5 – 6).

Na vala'auina Tanielu e fa'aliliua lenei tusitusiga. "Ma o le tusitusiga lenei sa va'aia: MENE, MENE, TEKEL, UPHARSIN" (Tanielu 5: 25). Ona fai atu lea o Tanielu i le Tupu o Peresara, "O le uiga lenei o upu ta'itasi. MENE: Ua fataulia e le Atua lou Malō, ua fa'ai'uina; TEKELE: Ua fuatia oe i le fua fa'atautau, a ua iloa oe ua māmāsagia. PERESA: Ua vaevaeina lou mālō, ua foa'iina atu iā Metai ma Peresia" (vv. 26 – 28). O le po lava lea na fasiotia ai Peresara le tupu o Kaletaia. Na maua le mālō o Tariu le Metai i le onogafulu ma le luan o ona tausaga (vv.30 – 31). O mālō a Metai ma Peresia na suia ai le mālō o Papelonia, e pei ona valo'ia e le Atua.

O le Lima o le Atua i Mataupu Fai a le Lalolagi

E o'o lava i nei vaitau o lo'o fa'alavelave pea lava le Atua ina ia ta'ita'ia atunu'u ma tagata. Manatua, le Mālō tele a Peretania sa le o se malosi na o'o i ai ae le'i

amata ona mou atu lona malosi. I sana tusitusiga Fa'aperofetaga ua Fa'ataunu'uina: O le Lima o le Atua i mataupu Fai a le Lalolagi, na fa'amatala e Dr. Roderick Meredith (1930 – 2017) le lavea'ina e le Atua o le fuāva'a tau a Peretania ile fa'aogāina o le tau:

I le 1586 – 87, o le malosi o le pule a Katoliko i le aigā tupu a Peretania na fa'aletonu i le fasiotia o Maria le Tupu Tama'ita'i Sekotilani. Le tausaga na soso'o mai ai, o le Tupu a Sepania o Filipo II na osofa'ia Enelani e lana fuāva'a tau e "124 – fuāva'a tau i se taumafaiga e toe fa'afō'i le pulega a Katoliko. E ui sa taumafai le fuāva'a Peretania e tau le taua, ae sa fa'aletonu. O le taimi tonu lenā, o se matagi malosi e le'i masalomia na tuputupu a'e ma fa'aleagaina ai va'a tau a Sepania. O va'a na fa'aleagaina e le tau na toe fo'i i Sepania.

Ioe, na fa'alavelave le Atua i le tau e fa'ataunu'u ai ana fuafuaga!Fai mai Dr. Meredith:

Ua ia fa'aopopoina lona mana i taimi e fa'alavelave ai i faiga fa'aletagata, "ua e lepetia va'a Tasesa i le matagi mai sasa'e" (Salamo 48:7) ...O le Tupu Tama'ita'i o Elis-apeta na foa'ia se pine siliva fa'amanatu o lo'o tusia ai se fa'aupuga, "Na feula e le Atua ma na salalau i latou." Sa ia iloaina o ai na pulea na matagi i lenā itulā tāua i le tala'aga o ona tagata.

I le fa'ai'uga o lenei tusitusiga se'i o tatou va'ava'ai i le perofetaga o le toe sau o Keriso e fa'avae Lona Malō i Lona sau fa'alua: Auā ua fanau mai mo i tatou le tama, ua foa'iina mai mo i tatou le atali'i, e i lona ua lē mālō. E igao fo'i o ia, o le Silisili'ese, o le Faipule, o le Atua malosi, o le Tamā o le fa'avavau, o le Ali'i o le Filemū. E leai se mea e gata mai ai ona tele o lona mālō ma le filemū o lona mālō i le nofoali'i o Tavita ma lona mālō. E fa'atumauina ma fa'amausalī i le fa'amasinoga ma le amiontonu, e afua mai i ona po e o'o i le fa'avavau, e faia lea mea i le mā'elegā o le ALI'I o 'au (Isaia 9: 6 – 7).

Ioe, o le "fa'ateleina o Lona malō ma le filemū o le a leai se u'iga." Ua tatou va'ai i le fa'ataunu'uina o le tele o perofetaga na valo'ia i le sau muamua o Keriso, ua tatou maua ai le malamalama o lona toe sau fa'alua e le toe umi ona tupu lea, e pei ona valo'ia, e aumai ai le Malō o le Atua i lalo o lana pule alofa ma le maumautūtū.

O lenei ua tatou i le taimi o le fa'atalitali mo lesu keriso e toe fo'i mai ma fa'avae Lona malō e fa'avavau. O le a ia lavea'ia le tagata. o le a ia aumaia le filemū e fa'avavau i nu'u uma o lenei lalolagi. E ao ona tatou sauniuni mo le sau o Lona Malō. E ao ona tatou mulimulita'i i ana fa'atonuga ma tatalo, "la o'o mai lou Malō"(Mataio 6: 10).

Ma e mafai ona tatou sauniuni i le fa'atuatua. O le Upu a le Atua – le Tusi Pa'ia – ua fa'aalia maia o ia lava e moni e le gata i perofetaga ua fa'ataunu'uina, ae o le Ala ile ola ua folafolaina mai. Ia fa'amanaia le Atua ia outou uma lava ao o outou fa'aogaina le ta'iala sili i le olaga e pei ona aumai e le tatou Fa'aola: A ia outou mua'i sa'ili le mālō o le Atua ma lana amiontonu; ona fa'aopoopoina atu lea o ia mea uma iā te outou" (Mataio 6: 33)...Uma

GALUEGA A LE AU APOSETOLO

(fa'aauau mai le lomiga talu ai)

O le Lauga a Saulo i Tamaseko. Ua fa'atasi fo'i Saulo ma le au so'o e na i Tamaseko i nai isi aso. ²⁰Ona tala'i loa lea e ia i sunako "O le Keriso, o ia lava o le Alo o le Atua.

²¹Ua matuā ofo i latou uma ē na fa'alogoi ai, ua fa'apea ane, "E lē o ia 'ea lenei sa sauā i Ierusalem i ē vala'au i lea lava igoa, ma ua sau i'inei ina fusifusia ma ta'ita'i iā i latou i le au ositaulaga sili?" ²²A ua atili ai le fa'amalosi o Saulo, ua femēmea'i lutaia sa nonofo i Tamaseko ma na fa'aalitino atu e ia, ole Keriso lava lenei. ²³Ua fai po, ona taupulepule lea o lutaia e fasioti iā te ia; ²⁴ua iloa e Saulo la latou taupulepulega. A ua lamalama i latou i faitoto'a o le 'a'ai i le ao ma le po, ina ia fasioti iā te ia. ²⁵A ua ave ele au so'o iā te ia i le po, ma tu'u ifo i le pā o le 'a'ai, ua tu'u ifo i le 'ato.

O Saulo i Ierusalem

²⁶Ua o'o Saulo i Ierusalem, ona taumafai lea se'i fa'atasi atu o ia i le 'au so'o; a ua fefefe i latou uma lava iā te ia, sa manatu i latou e lē se so'o o ia. ²⁷A ua ave e Panapa iā te ia, ma ta'ita'iina atu i le au apostolo ua na tala atu fo'i iā te i latou i lona iloa o le Ali'i i le ala, ma lona fetalai mai iā te ia, ma lana tautala fa'amalosi i le suafa o lesu i Tamaseko. ²⁸Feoa'i fo'i o ia ma i latou i Ierusalem, ²⁹ma tautala fa'amalosi i le suafa, o le Ali'i o lesu, ia tautala fo'i o ia, fefinaua'i ma le au Elenise; a ua latou taumafaia e fasioti iā te ia. ³⁰Ua iloa fo'i e le 'au so'o, ona ave ifo lea e i latou iā te ia i Kaisareia, ona auina atu lea o ia i Taso.

³¹Ona fifilemū lea o eklesia i lutaia uma lava, ma Kalilaia, ma Samaria, ua fa'amafanafanaina i latou; ua sāvavalī fo'i ma le mata'u i le Ali'i, ma ua fa'ato'ateleina i le fesoasoani o le Agaga Pa'ia.

9: 19b – 31 Na tala'i atu Saulo i Tamaseko ma asiasi atu i Ierusalem

O le fili na avea ma tagata fa'alauiloa ua amata lona olaga fa'aapostolo i Tamaseko i le a'oa'o ma tala'i atu i le sunako o lesu o le Keriso ua leva ona fa'atali (le Mesia po'o "Le na Fa'apa'iaina). Ina ua fai mai Luka na folafolaina e Saulo o lesu le Alo o le Atua, masalo sa ia manatu i lea lava fa'alagiga o le mea lava e tasi, o le Mesia (va'ai Salamo 27). Mulimuli mai o le fa'aogaina e le telosia le manatu atoa lava o le mamana, e pei ona maua i le loane 1: 1, 18.

O le a va'aia "o le a puapuagā" Saulo ona o le igoa o lesu (v.16) ua fa'ailoa mai e le taupulepulega e lutaia o Tamaseko i lona ola (v.23) ma i se taumafaiga lava e tasi a Elenise Roma (v. 29). I Roma o le molimaui a Panapa na talitonuina ma talia ai e so'o o le 'a'ai. E pei o le mataupu iā Filipo (8: 14 – 17), o le misiona a le tasi na mulimuli ta'ua e tu masani "o le Apostetolo" na mana'omia le fa'amautuina mai ta'ita'iga i Ierusalem. O lenei āumau ai fa'a – Roma lē tumau masalo o le asiasiga lea o lo'o ta'ua e Paulo, ae 'ese lona fa'amamafaina mai, i Kalailaia 1: 18 – 20.

I le fa'atusatusa atu i le sola'aga fa'alilolilo ua fa'ailoa mai ai le avea o Paulo ma apostolo, o le laina e tasi mai le fuaiupu 31 ua fa'amatala ai le tuputupu a'e o le eklesia i lea vaega atoa i le filemū ma le anoanoa'i.

O Peteru i Lita ma lopa

³²Ua alu solo Peteru i mea uma lava, ua alu ifo fo'i o ia i le au pa'ia na nonofo i Lita. ³³Ua na iloa ai se tasi tagata o Ainea le igoa, e valu ona tausaga o ta'oto i lona moega, ua ma'i o ia i le supa. ³⁴Ua fai atu fo'i Peteru iā te ia, "Ainea e, ua fa'amālōlōina oe e lesu le Keriso, inā tu ia i luga, ma teu lou moega." Ona tu loa lea o ia i luga. ³⁵Ua iloa atu fo'i o ia e i latou uma ē ua nonofo i Lita ma Saronia, ua liliu ai i latou i le Ali'i.

³⁶Sa i Lopa le tasi so'o fafine o Tapita le igoa, e ta'ua pe a fa'amatalaina, o Toreka; na tele ana galuega lelei ma mea alofa na ia faia. ³⁷O ia ona po ua ma'i o ia, ua oti ai; ua uma fo'i ona latou mulumulu iā te ia i le vai, ona tu'u lea iā te ia i le potu aupitoaluga. ³⁸Ua fetāla'i Lita ma lopa, ua fa'alogoi le au so'o o ia i Peteru, ona latou 'a'au atu ai lea o tagata e to'aluā iā te ia, ua ole atu, "Aua le fa'atuai ona alu atu iā te i latou." ³⁹Ona tu lea o Peteru i luga, ua ō ma i la'ua. Ua o'o atu o ia, ona aveina a'e lea o i latou iā te ia i le potu aupitoaluga; ua tutu mai fo'i fafine uma lava ua oti a latou tane, o fētāgisi mai ma fa'aali mai ofu tino ma ofu tetele sa faia e Toreka, ina o iā te i latou o ia. ⁴⁰A ua tulii atu Peteru iā te i latou uma lava i fafo, ona to'otuli lea o ia, ma tatalo ona fa'asaga atu lea o ia i le oti, ua fa'apea atu, "Tapita e, inā tu ia i luga." Ua, pupula o ia, ua na iloa Peteru, ona nofo lea i luga. ⁴¹Ona tago atu lea o Peteru i lona lima, ma na fa'atū iā te ia; ua vala'au fo'i o ia i le au pa'ia ma fafine ua oti a latou tane, na tu'u atu iā te ia ua

GALUEGA A LE AU APOSETOLO

ola.⁴² Ua iloa ai e lopa uma lava, ua fa'atuatua fo'i tagata e to'atele i le Ali'i.⁴³ Ona nofo ai lea o ia i lopa e tele aso i le tasi tagata o Simona le igoa, o le fai pa'u o manu.

9: 32 – 43 Ua fa'amālōlō Peteru i Lita ma lopa

Pe na fa'apefea i lenā tuputupu a'e o lo'o ta'ua i le fuiaupu 31 ona tupu ua fa'ailoa mai e ni vaega se lua mai le 'au'aunaga fa'amālōlō a Peteru. O le asiiasi atu i se fa'apopototoga Kerisiano ("latou e pa'ia") i le taulaga o Lita, sa ia fa'amaloloina se tagata ua leva ona maua i le pipili e igoa iā Ainea. O le va'aiga o Ainea ua fa'amaloloina ma "latou uma ē ua nonofo i Lita ma Sarona, ua liliu ai i latou i le Ali'i" (o se fa'apu'upu'uina o le sau i le fa'atu-

atuaga Kerisiano). Ole isi so'o sa faia ma fa'ata'ita'iga o Tapita, ua ma'i ma oti. O lona toe fa'aolaina mai i le fa'atonuga a Peteru na liliu ai le to'atele mai lopa.

O le 'au fa'amatala na maitauina o le gagana o lo'o fa'aogaina e Luka e fa'amatala ai nei fa'amalologa ua manatua ai le fa'amatalaga fa'atala'aga Teuterenome o galuega matagofie a Elia ma Elisaia (1 Tupu 17: 17 – 24; 2 Tupu 4: 31 – 37). Ua atili ai ona tosiga i le tu'uina mai e Luka o so'o o ni suli fa'aperofeta o lesu, e pei lava o ia o le perofeta – e pei o Mose. Ae ui i lea, e lē o ni suli i le manatu ua suia e latou lesu; o la latou 'au'aunaga o le fa'ailoa o le Ali'i lesu toetū o lo'o galue e ala mai iā i latou....fa'aaaua peia....

O LE PESE A LE 'AU'AUNA UA FAGAINA E IA I MEA LELEI ē SA FIA 'A'AI

Tula'i ia, inā malamalama ia, auā ua o'o mai lou malamalama; ua alu a'e fo'i le pupula o le ALI'I i ou luga. E o mai nu'u 'ese i lou malamalama, o upu fo'i e ō mai i latou i le pupula o lou alu a'e. Ia e fetapa'i i itū uma, ma e va'ai o lo'o fa'apopototo mai i latou uma. Ua latou o mai iā te oe, o au tama tane e ō mai i latou i mea mamaao, e afisi fo'i au tama fafine i lou itū. E lē toe goto le lā, e lē toe mayae atu fo'i lou masina. Auā e fai le ALI'I mou malamalama e fa'avavau, e uma fo'i aso o lou fa'anoanoa. O lou nu'u fo'i e amiontonu i latou uma lava; e fai mo latou le nu'u e fa'avavau. O le to'aititi e fai ma to'aafe, ma lē ua fa'atauva'a e fai ma nu'u malosi. O a'u le ALI'I, 'ou fa'avave ona fai i ona lava aso (Isaia 60: 1 – 12).

8

O le Pese a Maria o le pese o le fiafia ma le fa'afetai mo le atoaga o le agalelei ma le fa'amaoni a le Atua ua fa'aalia i le taimi fa'amesia. Sa tali i le fia 'a'ai o le tagata ma le fia inu mo le amiontonu ma le fa'aolataga na fafagu mai e lona agaga. O latou, e ui i lea, ua fa'atausua a'i i o latou malosi ma pipi'i i o latou 'oa fa'alalo nei e le mafai ona maitauina le 'Au'auna a le Atua, ma o lona iuga lava e o ua leai ni mea i o latou lima. O i'inei fo'i, le Pese a Maria ua latalata i le fausiaiina o fa'amaniuiaga."Amuia ē fia 'a'ai ma fia inu i le amiontonu; auā e mā'o'ona i latou" (Mataio 5: 6). O Maria, ma lona olaga atoa, i le pese o lona olaga, o se faia'oga sili o le foa'i mo le fa'aolataga. Ua na o latou ua fa'aaloalo i le Atua ma avatu le fa'afetai mo mea uma lava ua mafai ona talia ai lana kalasia. Fa'atasi ai ma Maria, tatou te ta'uta'u lo tatou fa'atuatua: "Tatou te talitonu i le Agaga Pa'ia, le foa'i le ola". O le Atua, le maoa'e o lona sa'olotoga ma lona alofa, ua mana'o e fa'asoa ma ona tagata, lona olioli, agalelei ma le atamai. Ae o le Atua e pa'ia. E le mafai ona ia foa'i atu o ia lava iā i latou e fa'asausili i lo latou fa'aititia o le Atua i mea ua latou faia. E vivi'i e Maria le Atua i lona olaga atoa. O lona agaga ua fa'atumulia i le fa'afetai, ma ua tumu o ia i le kalasia. I lona agaga maulalo ma le fa'afetai, ua avea o ia ma fa'ata'ita'iga o le Eklesia, o lē e ala i lana misiona ma e ala i le mana o le Agaga Pa'ia, ua galala ma fia inu i le Atua o le a fa'amamaluina e tagata uma ma o le a latou masani ai i le fa'aolataga. O Maria, le masiofo a perofeta, ua lapata'i mai tatou, e ui i lea, i le gaogao ma le lē fiafia o latou ua leai se agaga fa'afetai. A leai se agaga fa'afetai' ua leai se mealofa. O le Atua e pa'ia e le mafai ona fa'asoa o ia lava ma latou e lē o taumafai e avatu iā te ia le fa'aaloalo ma pese i lona vi'i'ga fa'atasi ma Maria. O le mea lea, ua toe ta'ita'ia i tatou e Maria i se malamalama'aga loloto i le ulua'i fa'amaniuiaga, o lē mativa ua tula'i i luma o le Atua maitauina atoa lava o mea uma o ana mealofa ma e ao ona tatou olioli, fa'asoa ma isi mealofa a le Atua e to'atasi ma le Tamā. O i o tatou luma ua va'aia ai Keriso, o ia e tumau lona mau'oa, ae ua faia o ia lava o se mativa, ina ia iā te ia, ia mafai ai ona tatou fa'asoa i le 'oa a le Atua. Ma ona ua ia fa'amaualaloina o ia lava i lona fia 'ai tele ma le fia inu ina ia tatou mau'oa ai, o le Tamā ua vivi'i i lona igoa; ua avatua iā te ia igoa ua sili atu i igoa uma lava.

Ua valauina i tatou i le pa'iaga. O tatou, e ala ile fa'atuatua ma le papatisoga, o se foafoaga fou. E mafai ona tatou ola ai fa'atasi ma Keriso. Ae mo nei mea uma lava, o le mea sili le tāua o le tatalo tumau e ala ile Agaga Pa'ia ua fa'aola ai i totonu o i tatou le fa'anaunau mo le pa'ia atoa; se fa'anaunauga e ola ai ma Maria i le fa'aso'oina i le loto mamā ma le fa'amaualalo a Keriso, e pei o lenā mealofa le agava'a o le faimea tonu ua tatou maua mai le Atua

Tatou te fa'afetaia oe, Le Silisili ma le Atua alofa,
 Mo lo matou fa'aolataga
 Ua e auina mai le Upu e fa'avavau
 Ina ia avea e pei o matou i mea uma vaganā ai le agasala.
 Ua e liliu atu ou foliga ma le agalelei
 ia i latou ua fi a'a'ai ma fia feinu i le fia vivi'i
 iā te oe ma le alofa,
 ma pese vi'iga i lou Suafa.
 Matou te vi'ia oe mo le fa'aalia o lou atamai,
 lou malosi ma le mamalu
 i lau 'Au'auna, lesu Keriso,
 fa'apea le fa'aalia o lou agalelei i lau
 'au'auna agamalū, Maria.
 Matou te tatalo i lona suafa, o lona suafa o ia o lau
 'Auauna,
 mo mealofa o lou lotomualalo ma le lotofa'afetai,
 ina ia mafai ai ona tatala o matou loto i lou agalelei
 ma le anoanoa'i o lou alofa.
 Fa'asa'oloto matou mai le alofa fa'apito ia i matou lava

mai le toea'ina e manatu fa'apito iā ia lava,
 mimita ma noa.
 Fa'amamā i matou i le afio lou alofa
 ina ia avea ai mafatiaga ma faigatā o matou olaga
 o ni la'asaga o le a'o'oina ina ia fia'ai ma fia inu
 ua na o lou fai mea tonu lavea'i.

Maria e, ua tumu i le kalasia,
 i lou loto, le fia 'ai ma le fia inu a Israelu
 ma tagata uma lava
 mo le fa'aolataga ua sau i lona atoaga.
 O le mea lea o 'oe o le tasi ua fa'amanuaina
 ua masani i le fa'aolataga
 tatalo mo matou i le lotomualalo, lotofa'afetai ma le
 galala ma le fia inu
 mo le fa'aolataga amiontonu a le Atua,
 ia matou sauiniuni ai i matou mo le fa'anaunauga
 mo lou olaga pa'ia. Amene.fa'aauau pea....

SAKALAMETA

O SAKALAMETA O TOFIGA MA TAUMĀŪGA: O MATAUPU FA'ATELOSIA I FA'AIPOIPOIGA MA TOFIGA PA'IA

(fa'aauau mai le lomiga talu ai)

Vaega 3 - Tofiga Kerisiano, o le Tino o le Tagata, Mataupu tau Feusua'iga ma le Tuputupu a'e o le Legavia (Nofo Taupou)

I lana galuega matagofie, o Peter Brown (1988) ua fa'aalia le fa'anaunauga i faiga fa'afeusua'iga ma auala ua galue ai malosi'aga i le afuafua fa'aleagaga ua galue ai, e pei ona atia'e ai le Fa'akerisiano, e suaia ai le aiga ma fa'aipoipoiga i le fatu o le sosaiete a Metitaria (Mediterranean) i le tagata ua nofo taupou. Ae i tū fa'alalolagi a lutaia, Roma ma Eleni o le nofo taupou ua fa'atāuaina, ae e le'i aveina i ai se tulaga o se uiga ogatotonu e fa'amasinoina ai isi ituaiga o olaga, i le Fa'akerisiano o le tagata ua nofo taupou, aemaise le tagata ua taumamao atoa lava mai fa'aipoipoiga, sa vi'ia o se fa'ata'ita'iga lelei atoatoa o le fa'aso'oina Kerisiano ma olaga

Kerisiano. O le tagata e lē o a'afia i le olaga feusua'i, pe o le ali'i po'o le tama'ita'i, matua pe talavou, ua avea ma fa'ata'ita'iga o le olaga. 'Eunuka mo le malō o le Atua' sa tāua ma i nisi o taimi o ali'i fa'atuatua na tu'uina atu o latou lava ina ia launiu, faatina po'o le lafo. O le fa'atulagaina e Kerisiano o le nofo taupou i le ogatotonu o lona va'aiga fa'alalolagi o lona uiga ua sili atu ai lona fa'atāuaina i luga atu o latou o lo'o a'afia i le feusua'iga ma luga atu o matua o le fanau. E pei ona fai mai Brown, "i le atu Metitaria atoa, o se fa'autautaga fa'anumera o tupulga talavou, na fa'aalia ai lo latou taumauga i tulaga fa'ataupou, e fa'aputu a'i, e pei o ni poloka 'aisa fa'atamilo i fa'apotopotoga Kerisiano' (Brown, 1988, p.192). Ae muamua atu i lenei piriota, o le Feagaiga Fou ma le au tusitusi i tua mai o le Feagaiga Fou na amata ona tusitusia e uiga i loto malosi e pulea ai le

fa'aosoosoga e uiga i mana'oga fa'aletino fa'apea ma isi.

I le alu ai o le taimi o nei talitonuga ua mausalī ma na i'u ai ua o'o lava iā i latou ua fa'aipoipo ma, le sili lona tāua o le fa'atinoa o lenei faiga, le feusua'iga ma le fa'amatelina e maua mai ai ua tulei i autafa o mafaufauga Kerisiano o le mamā ma le pa'iaga, se'ia taunu'u i le vaitau o Aukusitino ua faia ni fa'atalanoaga e uiga i le lelei po'o le agasala o le gaioiga fa'afeusua'iga. Na malamlamaina e Aukusitino le gaioiga o le fa'atinoina o le alofa e fa'atumulua e le alofa fa'atu'inanau ae le faia e aunoa ma le mana'oga fa'aletagata, ae o le alofa ole Atua, pau lea o le ituaiga o alofa e mamā, ua atoatoa e aunoa ma le fa'amatelina o mana'oga. O le fa'atinoina o le alofa sa va'aia o se mea e lē uia vaganā le fuafuaina o fanau, ma ua na o tulaga o folafolaga tu'ufa'atasia e fa'aipoipoiga. O le manatu sa fa'apea: afai o le faia se

SAKALAMETA

O SAKALAMETA O TOFIGA MA TAUMAŪGA: O MATAUPU FA'ATELOSIA I FA'AIPOIPOIGA MA TOFIGA PA'IA

feusua'iga fa'alealofa e tatau ona mo le fuafuaina o fanau ma ua na o le tulaga fa'afa'aipoipoiga, ae ua sili ai ona nofo taupou ai pea.

O suiga na tutupu i vaitau anamua na sausau lemū ae tāua tele, o le suiga o ta'ita'i mai le fa'alalolagi i se lalolagi – Fa'akerisiano, i le vaitau na maliliu ai ali'i ia masani i olaga fa'alemalō ma le atamai i le fa'aogaina ole pule ua amata ona alia'e o ni epikopo Kerisiano i 'a'ai tetele o le lalolagi Roma. O lona uiga o le ogatotonu o le olaga fa'alemalō o tagata nofo voto taupou, e masani o se ali'i, ua avea ma tagata fa'amasino o mataupu i tulafono fa'alemalō. O le tagata ua fa'aipoipo, e ui e lē o ave'esea mai le pule, ua a'afia i suiga ua fa'asolosolo mai o le sui tulaga ai o le au nofo voto taupou, ona o Sepiliano na fa'amatalaina o lona nofo voto taupou pe a fa'asino lea i le epikopo a Roma. O ta'ita'i o ekalesia, ali'i e pei o Sepiliano, sa masani ona tuputupu a'e i si'osi'omaga ua na o ali'i, le mea ua na o 'a'ano o le tino o tama tane sa faia ai le taulaga iā Keriso ma le fa'asaoina o lona amiontonu, aemaise mo tama'ita'i, sa matuā tāua tele. O le tino sa fa'ailogaina ai se mea mata'utia a le lalolagi ma o se taulaga a le maletile, ae e ao ona puipuia ma taofitofifi, fa'amamā ma talia e ala i le te'ea o le tu'inanau.

Se tasi o ali'i e suafa ia John Chrysostom i ana tusitusiga ma i se tasi o nei tusi e uiga i le Nofo Taupou, e fa'apea: 'ali'i ma tama'ita'i talavou ua lē o toe fa'aipoipo ina ia avea o latou malosi'aga fa'afeusua'iga e fai ma sao i le taulaga i le fanau maia o ni fanau. Ua fa'aipoipo ina ia fesoasoani atu ai le tasi i le isi i lo le pulea o latou lava tino. O lenei

va'aiga ua fa'amoemoe lea i le malamalama'aga mai le va'aiga Kerisiano i le tino ma le tu'u fa'atasia o mafauauga Eleni ma Roma e uiga i le fa'atonutonuina o le mana'oga. Sa manatu Chrysostom o fa'aipoipoiga ua lē toe aogā i taimi mulimuli mai o Keriso ma o se mea ua so'ona fai na pau le taimi na talafeagai o le pa'ū o Atamu (Brown, 1988, p. 307). Sa ia a'oa'o fo'i o fa'aipoipoiga ua le toe aogā ma o le tuputupu a'e o le malamalama ma le agaifanua ua aumai ai le vaitau o le feusua'iga fausia i lona muta'aga.

O Fa'aipoipoiga ua fa'aoga o se auala e fa'aitiitia ai mana'oga fa'aletino ma ua gaioi o se feso'ota'iga e fa'amuta, aemaise le mana'ona'o a se ali'i. O se manatu masani o se aiga o se faiga e fa'atino ai le galuega fai fa'atasi a le tane ma le avā ae o se nofoaga e manatu e pule lava le tane, ae o le fafine ua na o sē e nofo usita'i, avā usita'i, fa'apipi'i i le saogalemū o le amio Atua o avanoa fa'aleaiga, i tua atu i oa puipuia a le tane (Lauga 61 e pei ona ta'ua e Brown, 1988, p. 312).

O le popolega mai ia Chrysostom i'inei o le muta'aga o le malosi o le taulaga i sitiseni Kerisiano, ina ia mautinoa o le au matitiva ae lē o le 'au mimita ma le paoa o le autu o le tagata Kerisiano ma o aiga ia amiontonu ma fa'amaoni. Ua ia mana'o e tu'u le aiga Kerisiano i se tulaga e ave'ese tulaga fa'aleolaga masani ai. Ae o lenei, e pei ona fai mai Brown, e le'i taofia ai Kerisiano o lo'o nonofo i le taulaga mai le patipatia o fa'aipoipoiga fa'atagata lauaitele:

A latou feso'ota'i atu iā latou atali'i ma afafine i fa'aipoipoiga, o aiga Kerisiano o le seneturi fa sa

manavaina le 'ea mamafa, o le 'ea o laua'itele. O se polosesio fa'alaua'itele ua ta'ita'ia atu le teine fa'aipoipo e ala atu i le taulaga i le pale o lana tane. O pese ma siva ua fa'asino i ni fa'aupuga e lē 'alofia i mataupu tau i le alofa ma le fa'aogaina o faiga fa'afesusa'iga: ona e aunoa ma se feiloa'iaga malosi ma le lelei ma le fa'amoemoe, o se feiloa'iga fiafia fa'afeusua'iga i le moega fa'afaipoipoiga, o ni atali'i o le a fanauina lelei mai o le a lē mauaina mai lea mo le nu'u. O ositaulaga e seāseā vala'auina i nei taimi; ma o latou e 'au ai ua fautuaina e tu'ua vave. Mo se taimi, o le pisapisaō, o le lalolagi o le pale mata'aga e ala mai i puipui o le pale a le au Kerisiano (Brown, 1988, p. 313).

O le tāua o le taupou i manatu Kerisiano ua atili fa'amalosia i le telosia o le taupou a Maria o Nasareta i luma atu, le taimi ma le mulimuli mai o le afuafuaina o lesu ma isi tagata ola uma. O le manatu autū i'inei o galuega a Sagato Ambrose po'o le Epikopo a Milan....fa'aauau pe...

TUSITUSIGA MA TALA

O LE LOTOMAUALALO E MANA'OMIA MAI SO'O O IESU

Na filifilia e lesu Keriso le au matitiva, le au vaivai mo ana Aposetolo, tagata mai le va'aiga fa'aletagata sa lē talafeagai mo le galuega. E lē fa'apea e tatau ona tatou fa'avalevalea ma o mai ni aiga maualalo e galulue ai mo agaga, ae e a'oa'oina ai i tatou e lē afaina pe leai se natura pe lē talenia fo'i ma e lē o ni mafua'aga mo le alualu lelei. Na filifilia e Keriso le au faifaiva e fa'ailoa mai ai iā i tatou e lē o se galuega e faigofie; e ao ona tatou tapena mo faigatā tetele ma le lēlavā.

O se manatu matagofie tele a lesu Keriso, na mafai ai ona liliu le lalolagi atoa e ia lava, sa tatau ona filifili e faia e ala i ona so'o. Sa fa'aalu lona olaga atoa e sauniuni ai i latou. Sa tauave e lesu lava e ia vaega fa'agatā: o se maliu māasiasi, ma tu'u le ta'uta'ua i ona so'o. O le a se alofa sa fa'aalia e Keriso i le tu'u avanoa i isi e fesoasoani ai iā ia i galuega sa mafai ona ia faia.

Ua vala'auina se tasi ina ia fa'aliliuina isi e mana'omia se anoanoa'i o vituti, aemaise le lotomaualalo ma le usita'i. E lē tatau ona tatou misia avanoa ua tatou maua ae liliu nei faiga e pei o lā tatou te mulimulita'i i fautuaga i lo le avatua ma foliga mai ai o ni mea faigaluega i lo tagata faigaluega. O faiga nei o le a fa'amaualaloina ai i tatou ma faigofie ai galuega...

Ua e fiafia ile filifilia o 'oe e le Atua ina ia fa'aosofia ai lona alofa i loto o isi. Ina ia faia o lea e ao ona maua se loto maualalo loloto ma se fa'atuatua ia oe lava ma se ma'elegā. E tatau ona tatou fa'atino e aunoa ma le fa'atopetope ma fa'atalitali ma le filemū ma le mafanafana se'ia ioeina e le Atua ina ia fa'ataunu'u i nei agaga mea ua na o lana kalasia e mafaia ona fai ma ua na o ia e seleselaina le mammal.

AVEA MA SO'O O KERISO

11

Fesili: E fa'apefea ona tatou talitonu i se Atua a o lea e tele le puapuagatia ua si'osi'omia ai tatou?

Tali: O le puapuagatia lava ia e lē aogā, ae o puapuagatia ua fa'asoia i le Puapuagā a Keriso o se mealofa matagofie mo le olaga o le tagata. O le mealofa sili lona matagofie o le mafai ona tatou fa'asoia i puapuagā o Keriso.

Fesili: E fa'apefea? O le puapuagā o se mealofa?

Tali: Ioe, ma o se fa'ailoga o le alofa ona na filifilia e le Tamā e fa'ailoa mai iā i tatou e alofa i le lalolagi i le foaiina mai o lona Alo e maliu mo tatou. I lenā 'aula, e ala ile olaga o Keriso, o le puapuagā ua fa'amaonia ai o se mealofa, o le mealofa sili o le alofa, ona na ala i ona puapuagā na fa'amagaloina ai a tatou agasala.

Fesili: Tatou agasala?

Tali: Ioe, o a tatou agasala. O le mafua'aga lenā tatou te toe fo'i mai ai i le mea lava lea e tasi. Afai tatou te ioeina o tatou o tagata agasala ma tatou te mana'omia le fa'amagaloga, ona faigofie lea mo tatou ona fa'amagalo atu i isi. Ae afai tatou te lē fa'ailoaina lenei, o le faigatā mo tatou ona fa'apea atu, "Ou te fa'amagalo iā te oe," po 'o ai lava e sau iā i tatou.

Fesili: O le a le mea tatou te faia pe a o'o mai puapuagatia iā i tatou?

Tali: Talia ma le fiafia.

Fesili: Talia ma le fiafia?

Tali: Ioe, ma le fiafia, ona o se mealofa sili ua aumai e le Atua iā i tatou.

Fesili: O le a lea? Fiafia??

Tali: Fiafia atu i le Atua. Ina ia maua le loto tele e talia ai mea uma lava ua ia aumaia iā i tatou, ma toe avatu iā te ia mea na ia fesili mai ai ma le fiafia tele.

TUSITUSIGA MA TALA

FA'AEAINA MA LE VALA'AULIA A LE KOLUSE

A o tatou patipatia le Fa'aeaeaaina o le Koluse, se'i o tatou toe manatu o lesu lava ia na talanoa mai e uiga i le koluse i tulaga o le Alo o le Tagata ua "si'itia i luga." E i ai le taimi sa ia fai mai ai, *O a'u fo'i, āfai e si'itia a'u ai le 'ele'ele, ou te tosina uma mai tagata iā te a'u* (Ioane 12: 32). E mālie lava i le ulua'i Aso Faraile Pa'ia, o le au Apostetolo uma na sosola 'ese vaganā ai le to'atasi; ae ona o Kerisiano ua folafolaina i tausaga ma seneturi na mulimuli mai, le anoano o ali'i ma tama'ita'i na tosina i le tagata i luga o le koluse. Aiseā?

E ala i leToetū ma le sau o le Agaga Pa'ia, na matale mata o le au Apostetolo i le uiga agaalofa o le koluse, ma o le Ekalesia fa'aapostetolo ua folafolaina o ia na maliu ina ia lavea'i tatou mai a tatou agasala ma le alofa na tafe mai ai le faigataulaga o lo'o ola pea lava ma o lo'o i ai i sakalameta.

E fa'apefea ona foa'i atu le alofa pe afai e le'i taliaina muamua le alofa? O le koluse o le punāvai o alofa uma ua tafe mai le Ekalesia, ma ole koluse ua fa'aosofaina le salamō fa'amaoni ma ofo atu le fa'aolataga moni. Afai o le avanoa moni o le alofa ua le ofoina mai mo tatou, e fa'apefea i le salamō fa'amaoni ona mafai ona tuputupu mai i totonu o tatou?

Ia fa'aauau e lo tatou Ali'i fa'akoluseina ua fa'aalia lona alofa ma tosina atu i tatou iā te ia. Ia feiloa'i le alofa ola ma le salamō fa'amaoni, ina ia avea ai le tatalo fa'aperofeta o le Salāmo 21, ina ia fa'ataunu'uina ai le tatalo o le amiontonu ma le tagata puapuagatia: la olioli tou loto i le olaga e fa'avavau!"

I LE SAUNIGA – UA TALANOA MAI LE ATUA I ONA TAGATA

Le Tama e, auina mai lou Agaga...Afio mai, le Ali'i Iesu!

Se tasi o fa'atusa manaia o le Agaga Pa'ia o le matagi. Ua tatou fa'alogoina le matagi, ua tatou lagonaina le matagi. E masani ona tatou va'aia le lelea solo o mea e le matagi e pei o laula'au, oneone ma e o'o lava i lapisi e faula'i solo aemaise lava aso e malosi ai lava matagi. Ae tatou te le'i va'aia lava le matagi lava ia.

O le Agaga Pa'ia e lē va'aia lava, ae ua faia e le Agaga Pa'ia fa'ailoga e mafai ai ona tatou fa'alogoina o ia fa'aletino. Ona o tatou o tagata, i le agaga ma le tino, ma o le Agaga e masani ona sau iā i tatou e ala i o tatou fa'alogoga fa'aletino.

O le mea lea, o le Agaga Pa'ia ua mafaia ai ona tatou lagonaina le i ai o Iesu, ona ole alofa ma le fa'aaloalo mo tatou tagata. Sa ia ulua'i faia lea i le manava o Maria, ina ua fa'apaoloina o ia ma na avea ai le Upu ma Tino. Sa ia faia i le Penetekoso, ina ua suia ai le 'au Apostetolo ma a'oa'o atu fa'atasi ma le ola ma le mautinoa o Keriso o lo'o iā i latou.

O le Agaga fo'i ua fa'atinoina mai Keriso i le Misasa. O le ositaulaga ua talosagaina le Agaga ina ia sau ina ia avea le falaoa ma le uaina o le afio moni ai o le Tino ma le Toto o Keriso.

O Iesu o se vaega o le aiga o le Tasitolu. E le ta'ito'atasi lava o ia. E lē sau ua na o ia iā i tatou. Ona o le tatalo o le Eukalisitia ua aga'i i le Tamā; ma o le Eukalisitia, o Iesu lava ia, ua sau e ala i le galuega a le Agaga Pa'ia.

E pei ona fa'atasi ai le Tamā ma le Agaga ma lesu i lona papatisoga, ua fusia mai e le Tamā ma le Agaga le Tino Misitelio o Keriso, le au fa'aululuga ma suli uma, i Misasa ta'itasi uma.

FA'ATUATUA I LE PULE A LE ATUA

Tatou te manatu e lē tatau ona taofiofia mai se tasi mai fua o le fa'amalieina ma mai le fa'amoemoe o le filemū, ona ua tatou iloaina i lo tatou fa'atuatua i le Tusi Pa'ia mamana, o le Atua lava ia na tusia ma lē na amataina, o tagata agasala ua toe fa'afō'i mai ina ia salamō, ma o lenā fa'amagaloga ua lē taofia ai lē ua salamō...

Po'o afea lenā aso, ma o se mea sili pe a taunu'u, le au uso e! E amata ona su'esu'e le Ali'i i ona tagata ma maitauina i le su'esu'eina ma le malamalama mamana le aogā o tagata ta'ito'atasi. Ina ia lafoa'i i ifeli le au tevolo, ma tausalaina tagata fa'asauā...ma ioe, ia avatua iā i tatou le taui o le fa'atuatua ma le tu'utō! O le a lenā mamalu, ma o se fiafiaga tele o le mafai ona va'aia le Atua! Ina ia fa'aeaeaaina e talia le fiafia o le malamalama e fa'avavau ma le fa'aolataga i le afio ai o Keriso le Ali'i, lou Atua! Le feiloa'i atu iā Apera'amo ma Isa'ako ma Iakopo ma le au pateriaka, apostetolo, perofeta ma le au maletile! Ina ia fiafia ma le au amiontonu ma uō a le Atua i le Malō o le Lagi, i le fiafiaga o le fa'avavau o le a fo'iina mai. I le taliaina i'inā mea e le'i va'aia e mata pe na fa'alogoina fo'i e taliga, mea e le'i ulufia e loto o le tagata.

Na valo'ia e Apostetolo o le a tatou maua mea e tetele atu i lo mea na tatou faia po'o ni puapuagā na tatou i ai, ina ua ia fa'apea mai: e lē tatau ona fa'atusaina le tīgā o nei ona po ma le manuia atalī e fa'aalia mai iā te i tatou (Roma 8: 18). A taunu'u lenā tatalaina ma susulu mai le malamalama o le Atua iā i tatou, fa'amamaluina e le fa'amaulalo a le Ali'i, o le a fa'amanuiaina i tatou ma le fiafia.

PHOTO GALLERY



Lumana'i o Aseta ma Meatotino a le Palisi Te Awakairangi.

Saunia Lauano Ilaoa

E iai ni suiga ua fa'atonauna e le Afioga ile Akiepikopō ole Puleaga Fa'a-Akiepikopō ole Ekalesia Katoliko i Ueligitone, o John Dew, i fautuaga mai se sa'ili'iliga mae'ae'a sa faatinoina mo le lua tausaga ua mavae, e faatatau i le tulaga o meatotino a le Palisi o le *Te Awakairangi* i Lower Hutt.

O suiga ua **fa'atonauna nei** e le afioga ile Akiepikopō, e fa'apitoa i aseta ma meatotino a le Palisi lenei o le *Te Awakairangi* i Lower Hutt, lea e aofia i ai le fale fā o Ekalesia, o Sagato Petelo ma Paulo i Lower Hutt, Sagato Matini de Porres i Avalon, Sagata Pele-natete i Naenae ma Sagato Mikaele le Alekagelo i Taita.

O le tausaga e 2019, na **fa'atonauna ai** e le Afioga ile Akiepikopō ia John Dew ia palisi uma i totoluole Puleaga a Ueligitone, ina ia silasila toto'a ile tulaga o iai a latou aseta ma meatotino, e pei o Malumalu ma Fale o Faifea'u, atoa ai ma A'oga ma fanua o iai ia meatotino.

O le agaga ma le fa'amoemoe autū o le Fa'auluuluga ole Pule'aga, ina ia maua i lea sa'ili'iliga le ata atoa o iai le tulaga aemaise ole fa'aaogāina o ia meatotino, ina ia mafai ona fa'atulaga ai ni fuafuaga mautū mo le fa'aaogāina tatau o ia aseta ma meatotino ile lumana'i.

O le tu'uitiitia ma le tau leai o ni Faifeau i totoluole Puleaga, aemaise foi ole saogalemū ma le tulaga gafatia e malumalu ma fale ole Ekalesia o le fua fa'atulafonoina mo mafui malolosi, atoa ai ma mana'oga ma atina'e sa ave iai le fa'amuamua a le Sinoti Tele a le Puleaga Fa'a-Akiepikopo ile tausaga e 2017, sa mautinoa ai e lē mafai ona fa'auau ai pea i le tulaga o iai, le va'aia ma le tausia o aseta ma meatotino uma nei a le Puleaga a Ueligitone.

14

Mo le Palisi lava ia a le *Te Awakairangi*, sa tofia e ona Ta'ita'i Fa'a-le-agaga, ia se Komiti Filifilia, latou te fa'ataunuina le fa'atonuga lenei mai le Akiepikopō. O lea Komiti Filifilia sa feagai ma le fa'atalanoaina o tagata lotu e tusa o latou manatu ma lagona, ma o latou foi sa sa'ili'ilua tulaga uma e tusa o le saogalemū ma le talafeagai o le malosi o malumalu ma fale o faifeau atoa ma falea'oga mai a'afiaga o ni mafui malolosi, atoa ai ma isi vaega uma sa aofia i le finagalo o le fa'auluuluga ole Puleaga. Sa avanoa foi le Komiti Filifilia lenei, e su'esu'e ma silasila i nisi auala ma nisi faiga e ono mafai ona fa'atino, ina ia fa'amalieina ai le finagalo ole Akiepikopō, e pei ona folasia.

O feiloaiga ma talanoaga a le Komiti Filifilia lenei ma le mamalu o tagata lotu, o se vaega autū lea o lenei sa'ili'iliga, auā sa mafai ona maua ai ma fa'amaopoopoina fa'amatalaga aogā ma le taua, e tusa o auala ma faiga 'ese'ese e mafai ona faataunu'ui-na ai le finagalo o Katinali John Dew. Sa manino lava le saunoaga ale Alii Katinali, e le mafai ona fa'auau pea le tulaga tuai o loo iai le pulega ma le faatinoina o galuega a le Pule'aga.

O le Lipoti atoa ma fautuaga a le Komiti Filifilia a le *Te Awakairangi*, e tusa o ana aseta ma meatotino, sa taua'aoina atu lea ia Katinali John Dew ia oketopa 2019.

O le **Fautuaga Autū o lenei Lipoti**, ina ia aga'i atu le Palisi lenei o *Te Awakairangi*, e fa'aitiitia i le na o le lua ona falesā ae tasi lona ofisa tutotonu, i le lumana'i. O le manatu ole Komiti Filifilia i lea taimi, "o lea faiga, ole a mafai ai ona maua e le Palisi ala-

manuia e mafai ai ona iloilo le faataunuina o nisi faiga fou e faatino ai le tala'iina ole finagalo ole Ali'i atoa ma isi polokalame fa'alelotu i totonu lava ole Palisi"

O a'afiaga ole Faama'i ole Koviti-19, sa fa'apea ona fa'atoa taua'aoina mai ai le Tali Aloa'ia a lana Afioga Katinali John Dew mo le Palisi a le *Te Awakairangi*, ile masina o Juni ole 2020. Sa fa'apea ai foi ona fa'atalosagaina e le Afioga ile Katinali ia Faifeau ma le Taitai Fa'alelotu o Palisi a le *Te Awakairangi* ma le *Te Wairua Tapu*, ina ia galulue faatasi e toe silasila toto'a i nisi vaega sa ia finagalo iai. O lona finagalo, pe mafai ona silasila i latou nei, i ni a'afiaga o Lipoti ma Fautuaga a Palisi nei e lua i tagata o Lower Hutt, pe afai e tuufaatasi.

Sa fa'apea loa ona feiloai Taitai o Palisi nei e lua mo le talanoaina ma silasila toto'a ia latou lipoti ma fautuaga, i lalo ole ta'ita'iga a Patele Brian Cummings SM. Na amata ia galuega ia Aukuso 2020 ma faasolo mai ai seia paia Tesema 2020. O le taunuuga o ia feiloaiga ma fetufaa'iga sa fa'apea ona taua'aoina atu ile Afioga Katinali John Dew ia Tesema 2020 ma fa'apea ona ia toe feso'ota'i mai ai i Taitai o Palisi e lua ia Fepuari 2021.

O le mae'a ai o isi feiloaiga ile va o Komiti Fa'afroe o Palisi e lua ma Taitai Fa'ale-Agaga o Palisi e lua, ona taua'aoina atu ai loa lea ole Lipoti fa'ai'u i lana afioga Katinali John Dew. Na maea lea, ona fa'apea lea ona taua'aoina mai e le Afioga Katinali ia fa'atonuga 'ese'ese mo Palisi a *Te Wairua Tapu* ma le *Te Awakairangi*.
Mo le Palisi a *Te Awakairangi*, o lenei taunu'uga ua fa'amaonia ai ia se suiga sa faia i la matou lipoti ma le fautuaga muamua.

O lea fa'ai'uga, ina ia se'e atu le Palisi ile aofa'iga e tolu ona falesa, e auala ile fa'atumauina o malumalu tapua'i o Sagato Petelo ma Paulo, Sagato Mikaele, ma pe a talafeagai ai ma le malumalu o Sagata Pelenatete.

O le a fa'apea foi ona faatumauina ia Fale ole Galuega ia o loo iai nei i Lower Hutt fa'apea ma Taita.

O le isi la'asaga e soso'o ai nei, ole faavaeina lea o se Komiti o Galuega e latou te fuafuaina ma fautuaina le Palisi i le tau e mana'omia mo le toe fa'amalosia ole malumalu o Sagata Pelenatete.

Ao faagasolo ia galuega, ole a faaauau pea ona fa'aaogaina le malumalu o Sagato Matini de Porres i Avalon fa'apea ma le Fale ole Galuega. O le taimi e mautu ai se tonu mo le fa'amalosia ole falesa o Sagata Pelenatete, ona fa'aaogaina loa lea o le falesa lea o Avalon ae tapuni Sagata Pelenatete mo ia galuega. A uma lea galuega, ona tapunia motu loa lea i Avalon.

E ui ina o lea ua manino mai le fuafuaga mo le lumana'i, ae mautinoa o loo tatou iai pea ile savaliga agai i luma. O le taimi ole a maua ai nisi faamatalaga auiliili i fuafuaga ma tulaga uma e tusa o lenei fa'aiuga, ole a fa'apea lava ona fa'ailoa atu ile mamalu o le tatou Palisi ma tagata lotu uma i tulaga masani.

Ae atonu e lē o toe po se lilo ile silafia, o le fa'aauau pea o sā ma puipuiga ona ole fa'amai ole Koviti-19, ua telē lava sona a'afiaga i lenei fa'amoemoe e pei ole tele o isi galuega ma atina'e a le Pule'aga Fa'a-Akiepikopo a Ueligitone.

FAITAUGA MO LE MASINA O NOVEMA 2021

ASO 7 NOVEMA—ASO SA 32—TAUSAGA MASANI

Faitauga 1: 1 Tupu 17: 10 – 16: Matua: Na fai e le fafine ua oti lana tane o le potoi areto itiiti, ma aumai ai iā Elia.

Salamo: 146: 7 (tali), 8 – 9 (tali), 10 (tali) : Tali: Lo'u agaga e, ia e viv'i atu i le Ali'i

Faitauga 2: Eperu 9: 24 – 28: Matua: O Keriso, ua tasi lava ona avatua o ia ma taulaga, iha ia aveina ai aqasala a le to'atele.

Aieluia, Aieluia...la outou mataala e lē aunoa ma tatalo ina ia i luma o le Atali'i o le tagata ...Aieluia.

Evagelia: Mareko 12: 38 – 44: Matua: O mea a lenā fafine mativa ua oti lana tane, ua lafo i le mea e teu ai tuge, ua sili ia iā latou uma na lafo i ai.



Tofitofiga O le Upu: Ua tatou taunu'u mai i aso Sa mulimuli o le tausaga fa'alelotu o lenei tausaga. O faitauga ua tu'uina mai ua tumu i tomanatunatuga o ai le Atua ma po o ai fo'i i tatou. O le Atua o lo'o tumau pea o le Atua e lavea'i! Ma ua fa'amanatu mai ai iā i tatou o tatou vaivaiga.

O le malamalama i le tulaga vaivai e faigatā mo tatou, aemaise nei vaitau. O tatou aganu'u ua fa'alototeleina i tatou ina ia loto tetele ma galulue fa'atasi. O mafatiga ua tatou i ai ona o ni a'afiaga i vaega fa'alenatura ua alualu ai i luga lenei moni. Ua fa'amanatu mai lenei taimi o fa'aletonu e pei o mafui'e, afā ma matagi malolosi ma mafui'e. O fa'alavelave fa'afuase'i ua fa'aletonu ai tino, ponaivi gaui, o fa'ama'i ma a'afiaga o tausaga ua matutua ua faigatā ai ona toe fo'i ilē olaga sa masani ai.

I le faitauga muamua ma fa'apea le Evagelia, ua tatou fa'alogologo ai i tala i fafine ua maliliu a latou tane. O le maliu o se pa'aga ua sau ai ma ni suiga loloto ma le mafatia i le olaga o le pa'aga o lo'o ola. O faiga massani ai o le aso e tatau ona sua. Mo se fafine, aemaise le vaitau o le Feagaiga Tuai, o tulaga fa'asosaiete, le leai o se tane e lē gata e puipuia ae o se lagolagosua fa'aletulafono.

O le fafine ua malii lana tane o Sarefata ua i se tulaga fa'aletonu, ua leai se fa'amoemoe, ua ta'u atu iā Elia o le a sauni se taumafataga mulimuli ona oti ai lea. O lana fagu e tu'u ai suā'u ma le fagu e tu'u ai le falaoamata ua gaogao. Sa ia talitonuina folafolaga a Elia o le ā ni mea itiiti o iā 'oe afai e avatu iā te ia o le a maua mai ai se ola fou ma le lelei atili. E ui i le leai o ni mea totino ae na tali atu lava le fafine i se fa'amoemoe ma na fa'amanuiaina ai o ia.

I le Evagelia a Mareko na fetauaiga e lesu le au

tusi'upu mo le" fa'auma fale a fafine ua oti a latou tane" – ua a'afia ai le au matitiva. Ona iloa atu ai lea e lesu se tasi o nei fafine ua oti lana tane "ua lafo ane ai tuge iti e lua" i le mea e teu ai tuge. Le maualuga o lona tamali'i'aga; o lona mativa e le'i fa'aitiitia ai lona agalelei. O le i ai i se tulaga o le leai o ni mea ua aumai ai le agalelei maoa'e. na fa'aiola e lesu lenei fafine o se fa'ata'ita'iga o le fa'atuatua ma le talitonu i le Atua.

Atonu e le fa'atusalia le to'atele o tatou ma fafine ua oti a latou tane ua tatou fa'alogologo i ai i faitauga o le asō, ae o tatou uma lava ua iloaia ia tulaga o le loto vaivai. E masalomia o se tali masani ole 'alo'ese mai ai. Ae ui i lea, e i ai le tatou fa'amoemoe i le manatu o lo tatou Atua e lavea'i. O lenei Atua o lo'o atagia mai i faitauga o lenei Aso Sa.

Ina ua feiloa'i atu Elia i le fafine o Sarefata, sa ia fai atu i ai: "aua e te fefe." O le Atua e lavea'i e lē tu'ua le kate falaoa, e lē fa'aitiitia le suā'u i le fagu. O tatou taimi o le vaivai ua tu'uina mai ai le mafua'aga e fa'amoemoe ai i le Atua, fa'atuatua i folafolaga a le Atua.

I le Evagelia, o le fafine mativa ua oti lana tane ua vi'iā e lesu i luma o tagata: E moni, ou te fai atu iā te outou, o mea a lenā fafine mativa ua oti lana tane ua lafo i le mea e teu ai tuge, ua sili ia iā latou uma na lafo i ai. Auā o i latou uma, ua latou lafo nisi mea mai a latou ua tele; a o ia ua mativa ua ia lafo ana mea uma sa iā te ia, o ana mea uma e ola ai." I le silafaga a le Atua o lona agalelei ua talia atoatoa.

I lenei aso Sa, i nei faitauga, ia tatou tomanatunatu pe na fa'apefea ina ua tatou lagona le vaivai, ma pe na fa'apefea ona tatou tali atu i ai. Ia tu'u atu uma o tatou fa'atuatua i le Atua, o lē e lavea'i.

FAITAUGA MO LE MASINA O NOVEMA 2021

ASO 14 NOVEMA—ASO SA 33 TAUSAGA MASANI

Faitauga 1: Tanielu 12: 1 – 3: Matua: O ona po fo'i ia e lavea'iina ai ou tagata.

Salamo: 16: 5, 8 (tali), 9 – 10 (tali), 11 (tali): Tali: Le ali'i e, ia e leoleo mai iā te a'u, auā 'oq te fa'atua iā te oe.

Faitauga 2: Eperu 10: 11 – 14, 18: Matua: Auā o le taulaga e tasi ua fa'aatoatoaina ai e ia e fa'avavau o e fa'atapaiaina.

Aleluia, Aleluia....la e fa'amaoni seia o'o i le oti, ona 'ou avatu ai lea iā te oe o le pale o le ola ... Aleluia.

Evagelia: Mareko 13: 24 – 32: Matua: E fa'apotopotoina e ua filifilia e ia mai matāmatagi e fia.

Tofitofiga O le Upu: E i ai taimi tatou te fesili ai fa'apea i o tatou olaga – o le ā le uiga? O le ā le mafua'aga autū o tatou olaga, ma mo lena tulaga o le ā le taunu'uga o le tagata lava ia? Atonu e lē o se fesili lenei tatou te fesiligia ai i tatou i aso uma, ae mai lea taimi i lea taimi – aemaise lava i tulaga o fa'afitaui e pei ona tatou i ai nei ole Koviti – ole fesili ua tu'uina mai.

O le fesili lenei o lo'o a'afia mai faitauga o lenei aso Sa, le aso Sa mulimuli o taimi masani ae le'i patipatia le fa'amanatuga o le sulufaga tele o "Iesu le Tupu." I le tele o auala o lo'o i ai ni popolega a le Tusi Pa'ia e lē gata i le "amataga" ma le "iuga" O fea na tatou o mai ai? Atonu o lo'o fuafua e mataupu tau fa'asaenitisi le faiga tuputupu a'e na tatou o'o mai ai i le tulaga o le ola a le tagata, o lo'o mata'itu ai le Tusi Pai i le vaega tupito o le olaga ma lona amataga. I le fa'atauanau a le Tusi Pa'ia, o lo'o fa'asino i se Atua alofa ma le agalelei o se amataga o olaga uma. Na faia e le Atua le lalolagi ma le tagata e lē o se lagona fa'afuase'i ae o se alofa naunauta'i. I le gaosiaina ole tagata, tane ma le fafine, na faia e le Atua le tagata i le fa'atusa o le ola mamana, faia e pei o le Atua, ina ia talia ma fa'aali atu le alofa i le va ole amataga ma le iuga. O le taunu'uga mulimuli o le foafoaga ma le aiga tagata o le fa'atunu'ua lea ole ta'amilosaga na amatalia i le foafoaga: i le sa'ilila lea o se fa'atasiga alofa ma le Atua ma isi i le fatu o le Atua. O lenei fa'aliliuga o lo'o fa'amatala mai i auala 'ese'ese ma fa'amalamalamaga 'ese'ese i le Tusi Pa'ia. Ole faitauga muamua, mai le Tusi a Tanielu o lo'o fa'apea mai o nisi o latou "o ē momoe i le efuefu o le 'ele'ele latou te ala mai...ma ola e fa'avavau." O le a latou susulu malamalama "e pei o fetū e fa'avavau". O lenei tusi fa'atusi pa'ia na tusia i se taimi i fa'aletonu tetele, pe 150 tausaga i luma atu o le fanau mai o Keriso. O Israaelu sa i lalo o ni sauāga tetele mai le au Seleucids – o se aiga tupu mai Eleni sa latou pulea lea vaega ua ta'u nei o Suria. Ole malumalu na fa'aleagaina ma se lafoga tele na tu'uina atu i tagata lutaia. Ae o le fa'amoemoe na alu a'e mai le efuefu i le tula'i mai o le te'ete'e a le au Makapaio na fa'ato'ilaolina lea pulega sauā ma fa'avae ai pulega a tagata lutaia mo le seneturi. O le talitonuga e lē tu'u lafoa'ia i latou e le Atua na avatua le ola e o'o lava iā i latou "sa momoe i le efuefu o le 'ele'ele" ua sili lona malosi i lo le taufa'amata'u a le oti.

E masani i Salamo ona liliu i fesili o se "āta tele" – o le a le uiga o lenei olaga? Pe tu'ua i tatou e le Atua? O le filifilia o faitauga mo lenei aso Sa ua aumai ai se lagona tutusa ole fa'amoemoe e uiga i le manumalo a'ia'i o le ola i le oti. .."Auā e te lē tu'u a'u i le tu'ugamau; e te lē tu'u atu lou tagata pa'ia ia o'o i ai le pala." Ua fa'ai'u i le mafanafana maoa'e i le alofa tumau a le Atua mo tagata Israaelu: E te fa'ailoa mai iā te a'u le ala o le ola; o i ou luma le fiafia e malie ai; o i lou itū taumatau le olioli e fa'avavau."

Ae i le faitauga o le Evagelia, mai ia Mareko, o lo'o aumai ai se fesili o le taunu'uga a'ia'i o lenei lalolagi i tulaga maoa'e. O lenei filifiliga

ua sau mai le Mataupu 13 o lo'o fa'atasi ai lesu ma ona so'o i le mauga o Olive, e feagai ma le malumalu na fausia e le Tupu o Herota. Na fa'ate'ia e lesu ona so'o i le vavaloina o lenei malumalu matafogie ma ma'a tetele ma teuteuga i auro o le a fa'amalepeina i se aso, ma na latou fesili ma le maofa tele: Se'i e ta'u mai iā te i matou, pe fai afea ia mea? Pe se a fo'i le fa'ailoga pe a lata ona taunu'u o ia mea uma ma o a fa'ailoga o le uma ole lalolagi?

O le tali a lesu na avatu i se ituiga o tautalaga to'atasi, se tasi o vaega o le evagelia o le asō. O le lalolagi na foafoaina e gata ma o le iuga o le a sau: o le a fa'apogisaina le la, e lē toe susulu mai le masina, e pa'u'u fo'i fetū mai le lagi. O elemene fa'anatura uma nei na fa'apitoa o latou tāua i tagata i le lalolagi anamua sa le tau maua ai ni sulu fai: sa tapasaina va'a e fetū i le lagi, o latou kalena sa fa'ailogaina e vaitau a le masina; o le lā sa maua mai ai le mafanafana ma le malamalama.

O tautalaga a le Evagelia ua ta'u mai ai le "Alo o le Tagata" – le Keriso Toetū manumalo – ua sau i ona tagata ma le "mana tele ma le mamalu." I se va'aiga fa'atupu, ma auina atu e Keriso ana agelu e fa'apotopoto tagata mai "matagi e fa" ma "tulu'iga o le lalolagi i tulu'i-ga ole lagi." I le tala a Mareko na fa'ai'u le lalolagi e lē o se fa'aleagaina po'o se fa'amasinoga mata'utia – ae o le fa'apotopotoina o tagata mai le lalolagi atoa, o se fa'apotopotoga i le fusi a le Alo o le Tagata, le tasi lava i le fa'amatalaga a le evagelia e tu'uina atu lona ola i luga o le koluse mo le to'atele.

I le taimi nei o a mea tatou te faia? E fa'apefea ona tatou sauniuni mo le taunu'uga mulimuli? Mai le Evagelia a Mareko o lo'o fautua mai ai le faia o ni masalosaloga lē mauttonu e uiga ile taimi tonu. O le autu o le va'ai a Kerisiano e lē o le va'ai i totonu ae aga'i i fafo atu aga'i i le lalolagi lava ia – fa'ailoa atu le tala lelei a le evagelia, fa'amalologa e pei ona fa'amaloloina e lesu lava ia. I faitauga e mulimuli mai nei faitauga o le evagelia, ua apoapoa'i e lesu ona so'o ina ia "mata ala" lona uiga ia sauniuni mo fa'ailoga o le afio ai o le Atua i le lalolagi o lo'o si'osi'omia ai i tatou, ma sauni e fa'afeilo'i pe a sau.

O nisi o Kerisiano e manatu lelei o lo'o fa'aalu taimi e taumafai ai e fua le taimi e uma ai le lalolagi; o nisi ua manatu e sili ne'i aua le popole i isi lalolagi ua fa'aletonu ma o le a fa'aleagaina ma ua manatu ia ola i le popolega ma le mata'u ona o le malaia o le a sau. Ae le o le agaga lea o faitauga o le asō. E ao ona tatou fa'aauau pea ona ola ai ma le mataala, sauniuni mo le taimi o kalasia e lē mailoa le taimi e sau ai. I le fa'amatalaina o le "Tausaga o le Fa'atua" na fai ma sini o le tausaga 2012, na fa'apea mai ai Pope Penetito: E ola le Fa'atua pe a ola ai o se fa'atinoina o le alofa na taliaina ma fa'ailoa atu o se taliaina o le kalasia ma le fiafia na lagonaina."

FAITAUGA MO LE MASINA O NOVEMA 2021

ASO 21 NOVEMA—ASO SĀ IESU LE TUPU

- Faitauga 1: **Tanielu 7: 13 – 14:** **Matua:** O lana pule o le pule fa'avavau lea.
- Salamo: **93: 1 (tali), 2 (tali), 5 (tali):** **Tali:** O lo'o fai le Ali'i ma tupu, e ofu o ia i le malū malu.
- Faitauga 2: **Fa'aaliga 1: 5 – 8:** **Matua:** O ia o le pule o le lalolagi. Na ia faia fo'i i tatou ma nu'u fa'atupu, o ositaulaga i lona Atua.
- Aleluia, Aleluia...la manua le afio mai i le suafa o le Ali'i, ia manua le mālō ua o'o i lo tatou tamā o Tavita ...**Aleluia.**
- Evagelia: **Ioane 18: 33 – 37:** **Matua:** O lea lava, o a'u o le tupu.

Tofitofiga O le Upu: “E lē mai le lalolagi nei lo'u malō” Ioane 18: 36).

E i ai se vaega e uiga i le tau tupu e maofa ai i tatou. E masani o pirinise se ma perenise e maofa ai le lalolagi. Atonu o olaga a tupu ma masiofo o lo'o i ai ni tala fa'afagogo ua mafaufauina ai se olaga lelei ua na ona tatou moe miti i ai. Mo tagata matitiva i le taimi o tusi pa'ia, o le manatu i se tupu agaalofa, se tupu alofa e manatu i tagata, ma e lagonaina le tagi mo se faimeatonu ma gaioi ai, masalo e tele se tosiga atu i ai. Afai o se olaga a se tasi o se tauiviga fai so'o, o le talitonu i se tupu malosi, i le talo mai o lona lima e suia ai mea uma mo le au le amana'ia, fa'atupulaia ai le fa'amoemoe ma avatu ai se mafua'aga e taumafai pea.

E le fa'ate'ia la o Kerisiano o le a manatu o lesu o se tupu, po'o se Atua i tulaga tau tupu pei ona tatou masania ai. O le sulufaga o le asō e foliga mai e lua ni itū ma'ai, e pei ona aumai i faitauga. O lesu o le “tupu” ae i le tele o auala e lē o se auala fa'amalō tau tupu. I le evagelia ua tatou va'aia ai iā lesu ua fa'amasinoina e Pilato, o se fa'auauina ole lima tau tupu a Palesitina. E le pei o Evagelia Sinopi, e lē'i gugū lesu i luma ole kovana Roma. Ae na foliga mai o lesu o lo'o i ai le paoa, o lo'o ta'ita'ia le fa'amasinoga a Pilato. I la fetaliaina, sa le'i tali sa'o atu lesu i fesili a Pilato. Na ulagia e Pilato lesu e uiga o ia o le tupu. O le a lea ituaiga o tupu ua molia e ona lava tagata? Ua ulagia ai ma le fa'amoemoe o tagata Israaelu mo se malo tuto'atasi e pule e latou. O lenei tauemuga na fa'auau pea i se va'aiga na mulimuli mai ai ina ua fa'aofuina lesu e fitafita a Pilato i se ofu talaloa lanu violē ma fa'apaleina i se pale tuitui, ma fa'ata'ita'i le fa'afeiloa'iga e ave i le tupu, “Ave Kaisala” (Ave Caesar)!

Ina ua fesiliglia e Pilato “O oe o se tupu o tagata lu-taia?” Na si'i'ese e lesu le talanoaga mai iā ia lava o se tupu ma tautala e uiga i lana “mālō.” I le fa'aogaina o le gagana fa'atupu e tautala ai i le mālō o le Atua o lo'o i ai le alofa ma le atoaga o le olaga ua silisili, na faia fa'aupuga fa'atupu e lesu o le pule ua fa'aoga ma sauāina ai isi. O ana gaioiga ma upu ua ia fa'aleaogaina ai tulaga tau aiga tupu o le pule ma le usita'i. Sa vala'auina latou na mulimuli atu i ai o “uō” ma vala'auina i latou i se fa'apotopotoga o so'o alofagia, e muamua ona fulufulu e ta'ita'i vae o latou e mauaialalo. Mulimuli mai lenei fa'amasinoina o lesu, na mimita ma fa'aalialia Pilato i lana pule e fa'asa'oloto ai lesu pe fa'akoluseina, ae na fa'amanatu e lesu i le tupu a Roma e leai sana pule iā te ia vaganā ua tu'uina mai lugā (19: 10 – 11). Ae le gata i lea ua uma ona fa'ailoa atu e lesu i ona so'o e leai se tasi na te ave'eseina mai iā te a'u, ae peita'i o a'u, 'ou te tu'uina atu e a'u lava (10: 18). E le'i fia fa'alogi Pilato i lenei ituaiga o “malō” ma e lē malamalama le fe'au tete'e i le malō a lesu. Pau le mea e mana'o i ai Pilato o le fa'amalosia o lesu e fa'apea atu o ia o le “tupu” ona avea lea ma mafuaga e fa'aumatia ai lē ua ia manatu o se fili mo lona nofoātupu. E le'i tu'uina atu i ai e lesu lenā fa'amalieina ma na ia fa'ailoa atu o pilato o lo'o fa'aogaina lea ituaiga o gagana, e lē o lesu. O lo'o talanoa mai lesu i lana misiona ae lē o tulaga tau se tupu e faoa, ae o se tasi ua molimau i le moni. Pau le mea e avea ai ma tagata o lenei “malō” o lo'o i ai le moni o le fa'alogi lea i lona leo.

FAITAUGA MO LE MASINA O NOVEMA 2021

ASO 28 NOVEMA—ASO SA MUAMUA O LE ATEVETU: 2021 – TAUSAGA C

Faitauga 1: Ieremia: 33: 14 – 16: Matua: 'Ou te fa'atupuina iā Tavita le La la'au amiotonu.

Salamo: 25: 4 – 5 (tali), 8 – 9 (tali), 10, 14 (tali): Tali: Le Ali'i e, 'ou te fa'anaunau atu iā te oe ma lo'u loto.

Faitauga 2: 1 Tesalonia 3: 12 – 13; 4: 1 – 2: Matua: la fa'atumaunina o outou loto i le amio lelei pe afai mai lo tatou Ali'i o lesu.

Aleluia, Aleluia....Le ali'i e, ia e fa'ailoa mai iā te i matou lou alofa; ia e foaiina mao fo'i iā te i matou le olataga mai iā te oe ... Aleluia.

Evagelia: Luka 21: 25 – 28, 34 – 36: Matua: E latalata ina fa'aolaina outou.

Tofitofiga O le Upu: O le aso Sa lenei ua tatou amatalia ai le vaitau o le Atevetu, se tasi o pirota matagofie a le tausaga fa'alelotu. Fa'atasi ai ma fiafiaga o le Kilisimasi ua si'osi'omia ai i tatou i fale'oloa ma luga o letiō, ua faigofie ona tatou manatu ifo ua pau le uiga o le Atevetu o le sauniuni atu mo le fa'amanatuga o le Kilisimasi.

E ui e moni ae lē o le tala atoa lea. O le Atevetu, o lona uiga e fa'amanatu mai ai iā i tatou ni "taunu'uga" tetele se tolu. 1. O le sau o Keriso i le lua afe tausaga ua mavae i Petele'ema; 2. O le sau o Keriso i le iuga o taimi; ma 3. Le sau o Keriso i o tatou olaga i aso uma o le fa'atutuata.

O faitauga o le asō ua fa'a'autū fa'apitoa i "taunu'uga" lona lua ma le tolu. O le faitauga mai le Evagelia a Luka o se vaega o le tautalaga na avatu e lesu i ana a'oa'oga mulimuli i le Malumalu i lerusalema. I lenei va'aiga matagofie – o se malumalu o se tasi o matagofie a le lalolagi i le seneturi muamua – na lapata'i ai e lesu ona so'o o ma'a tetele ma teuteuga matagofie o lenei malumalu o le a fa'aleagaina i se aso. E o'o lava i se mea ua foliga mai e tumau pea ma pa'ia e pei o le Malumalu, e lē tumau. Na manatunatu lesu i le taunu'uga mulimuli o le tagata. O le a i ai ni taua ma ni puapuagatia ae o le taunu'uga mulimuli lava e lē o le gaogaosā po'o o le leai o ni mea ae o le toe sau o le Alo o le Tagata "ma le mana ma le mamalu." A afua ona faia o ia mea, ia tepa a'e outou ma ia ea i luga o outou ulu, auā e latalata ina fa'aolaina outou."

A va'ai lautele, o le Tusi Pa'ia o lo'o manatu i fesili tāua se lua: Muamua, O fea na tatou o mai ai? Ma O le a la tatou amataga tupito? Lona Lua, O fea tatou te aga'i i ai? O le a la tatou taunu'uga tupito? Ae o lo'o fai mai le Tusi Pa'ia o le galuega foafoa a le Atua alofa e le'i mana'o e "to'atasi" ae o lē na faia le anoanoa'i ma le lālelei o le olaga. O le foafoaga aupito sili e pei ona fai mai ai le Tusi Pa'ia, o le tagata ola, tane ma le fafine, o mea ola ioe, ae na faia i le fa'atusa ole Atua, fa'atumulia i le olaga mamana ma na mafai e pei o le Atua, alofa atu ma alofaina.

Afai o lenā gaioiga o le alofa na fausia o la tatou amataga tupito, o se toe fo'i i lenā asiosio o le alofa o le Atua o la tatou taunu'uga moni lea. E ui e fa'aoga le tele o fa'aupuga e fa'amatala ai, ua va'aia e le Tusi Pa'ia le taunu'uga mulimuli a

le aiga a le tagata o se tu'ufa'atasia ma le Atua o le alofa o lē na ulua'i foafoaina. O le fea'u autū lea a lesu lava ia, le Upu na liu Tino, i lē i le upu tomua a le Evagelia a loane ua tu'uina mai e sau mai le loto o le Atua, avea ma tino ma o lo'o nofo fa'atasi ma i tatou, ma o ia lava na toe fo'i i se fa'atasiga alofa ma le Tamā na auina mai o ia. O le mea lea na fa'aali ai e lesu i o latou tulaga loloto lava, o tatou olaga e i ai latou mafua'aga ma uiga. O le kanone a le Tusi Pa'ia ua atagia mai ai lenei: o le tala ua amata i le fa'amatalaina o le foafoaga i le Kenese ma fa'ai'u i le Tusi o Fa'aaliga ma le va'aiga o se le-rusalema fou ma le matagofie, le nofoaga mau a le Atua ma le tagata e leai ni loimata ma le toe i ai fo'i se oti.

O faitauga uma e tolu o lenei aso Sa ua naunau mo lenā aso mulimuli e pulea ai e le alofa ma fa'ato'ilalo ai le oti. Ma o faitauga uma e tolu ua fa'amanatu mai ai mea e tatau ona tatou faia i le taimi nei: mataala i le i ai o le kalasia a le Atua o lo'o si'osi'omia ai i tatou; ola ni olaga o le amiotonu ma le fai mea sa'o; ma faia amioga e fiafia ai le Atua. O le Atevetu ua fa'amanatu mai ai iā i tatou e lē tatau ona ola ai o tatou olaga i le fefe pe fa'aalu o tatou malosi i le taumatemate e uiga i le taimi o le iuga o le lalolagi. E le tatau ona fa'ama'imauina o tatou taimi i popolega o valo'aga mo le iuga o le lalolagi, ae ia i ai se manatu o le fa'amoemoe ma le mafua'aga ma ia taumauga e ola ai ola ua talafeagai ma le alofa tutunoa a le Atua mo tatou. Ole Atevetu moni – ma le tulaga a le Kerisiano – ua maua lea i upu a lesu: ia tepa a'e outou ma ia ea i luga o outou ulu, auā e latalata ina fa'aolaina outou."

19

**la manuia le savaliga o le Atevetu o lenei
Tausaga Fa'alelotu**



FAITAUGA MO ASO SA MUAMUA O TESEMA 2021

ASO 5 TESEMA—ASO SA 2 O LE AATEVETU

Faitauga 1: Paruka 5: 1—9. **Matua:** E fa'aalia lava e le Atua lona mamalu i totonu iā te oe

Salamo: 126: 1—3 (tali), 4—5 (tali), 6 (tali). Tali: Ua faia e le Ali'i mea tetele mo i tatou; ua tatou fiafia ai

Faitauga 2 : Filipi 1: 4 6, 8—11. Matua: Ia avea outou ma ē fa'amaoni, ma le lē ta'uleagaina pe a o'o i le aso o Keriso

Aleluia, Aleluia...Inā teuteu ia outou le ala ole Ali'i, ia fa'alauleleia ona ala. E va'aia e tagata uma le fa'aolataga mai le Atua...Aleluia.

Evagelia: Luka 3: 1—6. Matua: E va'aia e tagata uma le fa'aolataga mai le Atua

FA'ASOLOGA O MISASA SAMOA MO NOVEMA 2021

20

Aso Sa Muamua			
7 Novema 2021	09:00 am	Holy Trinity—Seatoun	Leai se Misasa
	11:00 am	Titahi Bay	Leai se Misasa
Aso Sa Lua			
14 Novema 2021	11:30 am	Naenae	Leai se Misasa
	12:00 pm	Taita	Leai se Misasa
Aso Sa Tolu			
21 Novema 2021	11:00 am	Newtown	Leai se Misasa
	11:00 am	Holy Family—Porirua	Leai se Misasa
Aso Sa Fa			
28 Novema 2021	11:00 am	Lowe Hutt	Leai se Misasa
	11:30 am	Stokes Valley	Leai se Misasa

Mikaele Teofilo:

m.teofilo@wn.catholic.org.nz
 021 0818 5037

+64 4 496 1707

PO Box 1937, Wellington 6140, New Zealand